

**Tɔnɔ kɔlɔ Pooli na pɔpɔni o pa
ROM TIINƐ tun**
**Tɔnɔ kɔlɔ Pooli na pɔpɔni o
pa Rom tiinƐ tun na bri
dɔbam kɔlɔ tun mu tuntu**

Pooli deen pɔpɔni tɔnɔ kuntu o pa We nɔɔna balɔ na wɔ Rom ni tun mu. Nɔɔna badaara ya manɔ ba bri-ba We cɔga kam. Pooli nan lagɔ si o di yi ba te, si o pa ba na baari mu, si o laan daari o ke o vu yigə.

Tɔnɔ kuntu wɔni o bri o zaasum dim maama na yi te tun:

Nɔɔnu maama ki lwarum mu, yi We nan soe ba maama, ku na yi Zwifə naa dwi-ge tiinə di. Ba maama wɔ wani ba na cɔga We tee ni, di ba na ki ba wɔ-dɔɔba di Zezi Kriki wɔlɔ na tigi ba ŋwaanɔ tun. Kuntu nan yi We pɛeri mu. Wɔlɔ maama na ki o wɔ-dɔɔba di Zezi tun wɔ na vrim lwarum di tɔni wɔni. Ba laan wɔ ta ŋwi di ba Yuutu Zezi, yi We Joro kum zani-ba (pɔɔrum 1-8).

Pooli ta ma bri Zwifə balɔ na vin Zezi di zim maama tun wɔɔo. O bri ni ba bá wani ba vin We manɔ maama, We zaani dim na wai wɔɔo maama tun ŋwaanɔ (pɔɔrum 9-11).

Ku nan na yi lele kuntu, We na ki dwi-ge tiinə maama lanyiranɔ te tun, ku manɔ si ba kwe ba titi ba pa Zezi, si ba taa ŋwi di wɔ-pɔɔo, si ku poli We wɔ (pɔɔrum 12-15).

Tɔnɔ kum tiim jəgə ni, Pooli bri ni o lagɔ si o vu Rom mu, si bantɔ di laan wani ba zən-o si o

ke o vu Esupanyɛ. O laan ma daari o jɔɔni nɔɔna balɔ maama o na ye yi ba wɔ Rom ni tun (pɔɔrim 15-16).

¹ Amɔ Pooli wɔlɔ na yi Zezi Kresi gamba-sono tun mu pɔpɔni tɔnɔ kuntu. Wɛ mu kuri-ni si a taa yi Zezi tintɔŋɔ, si a taa tɔɔli o kwɛr-ywɛŋɛ kam.

² Faŋa faŋa tun Wɛ maŋi DI pa DI nijɔŋnɔ bam mu pɔpɔni DI tɔnɔ kum wɔni, ni DI goni ni si DI pa nɔɔna lwarɛ DI kwɛr-ywɛŋɛ kam kuntu.

³⁻⁴ DI kwɛrɛ kam kuntu nan yi DI Bu wum taani mu, wɔlɔ na yi dɔbam Yuutu Zezi Kresi tun. Wɔntɔ na jigi nabiinu tun, ba lɔg-o Pɛ Davididwi tiinɔ bam wɔni mu. Wɛ Jorokum nan wɔ o tee ni di dam, yi kv bri ni o yi Baŋa-Wɛ Bu mu maŋa kalɔ o na bi o yaɣi tɔuni tun.

⁵ Wɔntɔ ŋwaani mu Wɛ ki dɔbam yu-yoŋo lanyɔrani, yi DI pa dɛ yi Zezi tintɔŋna si dɛ vu dwi maama tiinɔ te dɛ pa ba sɛ o kwɛr-ywɛŋɛ kam, si ba daari ba ki ba wɔ-dɛdɛa dɛd-o, yi kuntu wɔ pa Zezi Kresi na zulɔ.

⁶ Abam di tɔɣi á yi balɔ Wɛ na kuri si á taá yi Zezi Kresi nɔɔna tun mu.

⁷ A pɔpɔni a pa abam balɔ na wɔ Rom ni yi Wɛ soe abam yi DI kuri abam si á taá yi DI nɔɔna tun mu.

Dɛ Ko Wɛ di dɛ Yuutu Zezi Kresi wɔ pa abam yazurɔ di yu-yoŋo.

Pooli buŋi si o vu o na Rom tiinɔ bam

⁸ Dayigɛ woŋo yi, amɔ lagɛ a tɔɣi Zezi Kresi ŋwaani mu a ki a Yuutu Wɛ le abam maama

ɲwaani, di noona na te abam taani je maama ni á kɪ á wu-dɪɖba di Zezi tin.

⁹ Amu yɛni a loori We abam ɲwaani manja maama, yi We dilu a na tunɲi a paɪ di a wu maama di a na tooli DI Bu Zezi kwɛr-ywɛɲɔ kam tin ye ni amu te ciga mu.

¹⁰ A ta yɛni a loori-DI si DI pa-ni cwɛɲɔ, si a laan wani a ba abam te.

¹¹ Abam fra tiini ya jigi amu. A lagi si a na abam, si We Jorokum laan wani ku togi amu ku zɛni abam di We-pɛɛri dilu na wu pa á zigi lanyirani tin.

¹² A na lagi kulɔ tin mu yi si di na baari da-tee ni, dibam maama na jigi wu-dɪɖba di Zezi tin ɲwaani.

¹³ A ko-biɛ-ba, á taá ye ni a kwaanɪ kuni zanzan mu si a na ne cwɛɲɔ si a ba a na abam, yi a daa ta wu ne cwɛɲɔ di zim maama. A lagi si a ba si a wani a tunɲi titunɲi dilu na wu ja kuri tin mu abam titari ni, ni a na manɲi a kɪ te dwi tiinɔ badonnɔ di titari ni tin.

¹⁴ Ku yi fifiɖn mu si a tooli We kwɛr-ywɛɲɔ kam a bri noona maama, yi ku nyi ni jum mu te a yuu ni, ku na yi balu yi na puuri, naa balu yi na wu puuri tin, di swan tiinɔ di balu na yɛri kulɔkulɔ tin.

¹⁵ Kuntɔ ɲwaani mu amu tiini a lagi si a ba a tooli We kwɛr-ywɛɲɔ kam a bri abam balu na wu Rom ni tin di.

We kwɛr-ywɛɲɔ kam na jigi dam te tin

¹⁶ Amu ba kwari cavura si a bri noona We kwɛr-ywɛɲɔ kam. Taani dim kuntɔ mu jigi dam, yi We ma-di DI vri noona balu maama na kɪ ba

wu-dɪdɒba dɪ DI tɪn, kʊ puli dɪ Zwifəbam mu, yɪ kʊ laan ba kʊ wəli dwi-geitiinə dɪ da.

¹⁷ Wɛ kwər-ywəŋə kam mu brɪ nɔɔna DI na wó pa ba na cɪga DI tee nɪ te tɪn. Kʊ maama nan zɪgɪ ba na jɪgɪ wu-dɪdɒba dɪ Wɛ tɪn ŋwaanɪ mu. Wɛ tɔnɔ kʊm maŋɪ kʊ brɪ nɪ: «Wɔlɔ maama na jɪgɪ cɪga Wɛ tee nɪ tɪn mu yɪ wɔlɔ na kɪ o wu-dɪdɒba dɪ DI tɪn, oó na ŋwɪa cɪga cɪga.»

Nabiinə maama na gɛ bɔra Wɛ tee nɪ te tɪn

¹⁸ Baŋa-Wɛ nan brɪ nɔɔna DI banɪ na zaŋɪ dɪ ba ba lwarɪm dɪ ba kəm-lwaanɔ tum maama ŋwaanɪ. Ba na kɪ wo-lwaanɔ tɪn ŋwaanɪ mu pa ba yəni ba cɪ cɪga kam nɔɔna tee nɪ.

¹⁹ Wɛ nan vaŋɪ ba zwa, beŋwaanɪ DI maŋɪ DI pa nɔɔna cwəŋə sɪ ba lwarɪ DI cɪga kam. Wɛ tɪtɪ brɪ-ba DI cɪga kam jaja yɪ ba wɔ sɛ.

²⁰ Nabiinə warɪ ba naɪ Baŋa-Wɛ dɪ ba yɪə. Kʊ nan na zɪgɪ DI na kɪ lɔgɔ baŋa tɪn, nabiinə sɪnɪ ba naɪ wəənu tɪlɔ DI na kɪ tɪn. Kʊ ma pa ba wantɪ ba lwarɪ lanyɪranɪ nɪ DI yɪ Wɛ cɪga cɪga, yɪ DI jɪgɪ dam dɪlɔ na ba jɪgɪ tiim tɪn. Kʊntɔ ŋwaanɪ nabiinə bá wantɪ ba na bɔra Wɛ tee nɪ dɪ ba na wɔ sɛ-DI tɪn.

²¹ Ba maŋɪ ba ye Wɛ na yɪ wɔlɔ tɪn, yɪ ba nan ba zuli-DI nɪ ba Wɛ, naa ba taa kɪ-DI le. Kʊ maa pa ba wɔbɔŋa tɪ, yɪ ba bɪcara yam laan yɪ lim, yɪ ba yəri woŋo kɔlɔ na lana tɪn.

²² Ba maa paɪ ba jɪgɪ swan mu, yɪ ba laan yɪ jwəəru.

²³ Ba ba sɛ sɪ ba taa zuli Ŋwɪa Tu Baŋa-Wɛ, yɪ ba daaru ba zuli wəənu tɪlɔ ba tɪtɪ na mɔɔnɪ dɪ ba jɪa tɪn. Wəənu tum kʊntɔ mu nyɪ dɪ nabiinə balɔ na tɔ tɪn, dɪ zunə dɪ vara dɪ tɪga wo-vəəlu.

²⁴ Kuntɔ ɲwaanɩ mɔ Wɛ yagɩ-ba, sɩ ba taa tɔgɩ wo-yɔɔrɔ tɩɔ ba titɩ fra na zɔɔrɩ tɩn. Ba maa yɛni ba kɩ wo-digiru, yɩ ba tɔgɩ boorim kikiɛ yalɔ na yɩ ba cavɩra tɩn.

²⁵ Ba maa vɩn Wɛ cɩga kam, yɩ ba daari ba tɔgɩ vwan. Ba maa yɛni ba zuli wɛɛnu tɩɔ Wɛ na kɩ tɩn, yɩ ba tɔgɩ-tɩ nɩ tɩ yɩ Wɛ mɔ te. Ba daari ba yagɩ wɔɔɔ titɩ na yɩ tɩ maama Kɛru tɩn. Wɔntɔ nan mɔ manɩ sɩ o jɔɔni zulɛ sɩ kɔ taa ve manɩ kalɔ na ba ti tɩn. Amina.

²⁶ Kuntɔ ɲwaanɩ mɔ Wɛ yagɩ-ba, yɩ ba kɩ wo-digiru kikiɛ yalɔ ba fra na zɔɔrɩ yɩ ya jɩgɩ cavɩra tɩn. Kaana ma yɛni ba yagɩ ba banna, yɩ ba daari ba tigi dɩ ba donnɛ kaana, nɩ baaru dɩ o kaani na tigi daani te tɩn.

²⁷ Kɔ yɩ kuntɔ mɔ dɩ baara dɩ. Ba dɩ ba lagɩ kaana, yɩ ba daari ba paɩ ba fra zɔɔrɩ ba donnɛ baara ba ma tigi dɩ ba, yɩ kɔ ya wɔ manɩ sɩ ba taa kɩ kuntɔ. Baara yɛni ba kɩ cavɩra kɛnɛ yantɔ doɲ mɔ daani, yɩ kɔ pa ba na cam dɩɔ na manɩ dɩ ba lwarɩm kikiɛ yam tɩn.

²⁸ Nɔɔna bam kuntɔ nan buɲɩ nɩ Wɛ cɩga kam ba jɩgɩ kuri mɔ sɩ ba taa jɩgɩ-ka ba wɔɔɔɔ nɩ. Kuntɔ ɲwaanɩ mɔ Wɛ yagɩ-ba, sɩ ba taa tɔgɩ ba wɔɔɔɔ-yɔɔrɔ tɩm kwaga, yɩ ba kɩ wɛɛnu tɩɔ ba ya na wɔ manɩ sɩ ba kɩ tɩn.

²⁹ Ba wɔɔɔɔ maa su dɩ wo-balwaarɔ tɩɔ na ba tɔgɩ cɩga kam cwɛɲɛ tɩn, dɩ kɛm-lwaanɔ dwi maama. Ba yɩ maa zɔ wɛɛnu zanzan. Ba tiini ba jɩgɩ pu-sɩɲa, yɩ ba jɩgɩ wɔ-gɔɔ. Ba ma lagɩ nɔɔna gɔm, yɩ ba kwɛri ba jaani daani, yɩ ba daari ba ganɩ ba donnɛ. Ba maa buɲɩ wo-balwaarɔ ba paɩ ba donnɛ, yɩ ba yɩ bɩbarɩ-nyɩna.

³⁰ Ba maa η̄ōōnɪ ba c̄ōgɪ ba donnə yum. Ba maa culi Wε, yɪ ba twɪ ba donnə. Ba ta kwəri ba yɪ banɪ-nyɪna, yɪ ba brɪ ba tɪtɪ n̄ōōna yigə nɪ. Ba ta ma tiini ba būɪ kəm-balwaarɔ wɔbūɪ, yɪ ba ba nɪgɪ ba tiinə balɔ na lɔgɪ-ba tɪn.

³¹ Ba yəri kulɔ na wɔ maɪɪ tɪn. Ba maa jɪgɪ niə yale yale. Ba ma ba soe ba donnə, yɪ ba ba jɪgɪ ba η̄waɪa dɪ.

³² Ba nan maɪɪ ba ye Wε kwərə kam na brɪ kulɔ, nɪ balɔ na kɪ kəm-balwaarɔ tɪntɔ doɪ tɪn maɪɪ sɪ ba tɪ mɔ. Nan dɪ kɔntɔ dɪ, ba ta yəni ba kɪ-tɪ mɔ, yɪ ba tɛ dɪ balɔ na kɪ lwarɪm tɪn dɪ, nɪ kɔ lana.

2

Wε t̄ōgɪ cɪga mɔ Dɪ maa dɪ nabiinə sariya

¹ Nmɔ wɔlɔ na co n donnə tɪn, kɔ yɪ nmɔ tɪtɪ mɔ n coə, beɪwaaɪ nmɔ tɪtɪ dɪ kɪ wo-lwaanɔ tɪm kɔntɔ doɪ mɔ. Kɔntɔ tɪn, n bá wanɪ n na būra Wε tee nɪ.

² Dɪ nan ye nɪ Wε wó dɪ n̄ōōna balɔ na kɪ wo-lwaanɔ tɪm kɔntɔ doɪ tɪn taanɪ dɪ cɪga mɔ.

³ Nmɔ wɔlɔ na co n donnə kikiə yɪ nmɔ tɪtɪ dɪ kɪ-ya mɔ tɪn, kɔntɔ nmɔ būɪ nɪ n̄n̄ wanɪ n lu Wε sariya yam wɔnɪ mɔ na?

⁴ Wε nan tiini Dɪ jɪgɪ n̄ōōna η̄waɪa dɪ ban-pɔnɔ dɪ wɔ-zuru. Nmɔ nan paɪ wəənu tɪm kɔntɔ yɪ kafe mɔ na? Ta n ye nɪ, Wε na jɪgɪ nmɔ η̄waɪa tɪn, kɔ yɪ sɪ kɔ pa nmɔ wanɪ n ləni n wɔ mɔ n yaɪ kəm-balwaarɔ.

⁵ Nmɔ nan tiini n kɔ n būcarɪ mɔ yɪ n vɪn sɪ n ləni n wɔ. Kɔntɔ mɔ wó pa n cam dɪm tiini

dɪ puli dɛ dɪm Wɛ na wó ba Dɪ brɪ Dɪ ban-zɔŋɔ kɪm yɪ Dɪ daari Dɪ di nabiinə sariya dɪ cɪga tɪn.

⁶ Wɛ laan wó pa nɔɔnɔ maama na o nyim sɪ kɪ maŋɪ dɪ o tɪtɔŋa yam na yɪ te tɪn.

⁷ Nɔɔna badaara yəni ba vɔ ba wurɔ mɔ yɪ ba kɪ wo-laaru, sɪ kɪ pa ba na paari dɪ zulə dɪ ŋwɪa kalɔ na ba cɔgi tɪn Wɛ tee ni. Wɛ nan wó pa bantɔ ŋwɪa kalɔ na ba ti tɪn.

⁸ Nɔɔna badaara nan wurɔ ba na lagɪ bam tɪtɪ yɪranɪ zənə mɔ. Ba maa vɪn Wɛ cɪga kam, yɪ ba daari ba tɔgi wo-balwaarɔ kənə. Wɛ cam dɪm dɪ Dɪ ban-zɔŋɔ kɪm nan wó ba bantɔ baŋa.

⁹ Nabiinə balɔ maama na kɪ wo-balwaarɔ tɪn wó na yaara dɪ cam, kɪ na puli dɪ Zwifə bam, sɪ kɪ vu kɪ yɪ dwi-ge tiinə dɪ.

¹⁰ Kɪ daari, balɔ maama na kɪ kəm-laaru tɪn, Wɛ wó pa-ba paari dɪ zulə dɪ ywəəni, kɪ na puli dɪ Zwifə bam sɪ kɪ vu kɪ yɪ dwi-ge tiinə dɪ.

¹¹ Bɛŋwaanɪ Wɛ tɔgi cɪga mɔ dɪ Dɪ na kɪ nɔɔna maama te tɪn, sɪ Dɪ ba kuri-ba daanɪ.

¹² Balɔ na kɪ lwarɪm yɪ ba yəri Wɛ cullu tɪlɔ Dɪ na kɪ Moyisijɪŋa ni tɪn, baá cɔgi mɔ yɪ kɪ dai Dɪ cullu tɪm ŋwaanɪ. Kɪ daari, balɔ na ye Wɛ cullu tɪm na kɪ ba cɔgi, Wɛ wó tɔgi Dɪ cullu tɪm kɔntɔ ŋwaanɪ mɔ Dɪ ma di ba taanɪ.

¹³ Bɛŋwaanɪ, kɪ dai nɔɔna balɔ na cəgi Wɛ cullu tɪm tɪn mɔ wó na cɪga Dɪ tee ni, kɪ yɪ balɔ na sɛ ba kɪ Dɪ cullu tɪm na wɪ te tɪn mɔ wó na cɪga Dɪ tee ni.

¹⁴ Dwi-ge tiinə bam nan yəri Wɛ cullu tɪm sɪ ba taa tɔgi-tɪ. Ba tɪtɪ wɔbɔŋa nan na pai ba tɔgi cɪga kalɔ Wɛ cullu tɪm na brɪ tɪn, kɪ brɪ ni ba

manɪ ba ye kulɔ na manɪ sɪ ba taa kɪ tɪn mu, yɪ We cullu tɪm ta tɛri ba tee nɪ.

¹⁵ Ba titɔŋa yam brɪ nɪ cɪga kalɔ We cullu tɪm na brɪ tɪn tigi ba bɪcara nɪ. Ba wɔbɔŋa na paɪ ba tɔgi cwɛŋə kalɔ tɪn dɪ brɪ nɪ kɔ yɪ cɪga mu, bɛŋwaanɪ ba wɔbɔŋa wai ya brɪ-ba nɪ ba kɪ ba cɔgi, naa ya brɪ-ba nɪ ba jigi cɪga.

¹⁶ Kɔɔ ta yɪ kɔntɔ mu We sariya dɛ dɪm nɪ. Baŋa-We wɔ da Zezi Krisi ŋwaanɪ Dɪ bɔri nɔɔna maama wɔbɔŋa yalɔ na sɛgi tɪn, nɪ amɔ na brɪ We kwɛr-ywɛŋə kam te tɪn.

Wɔɔ mu yɪ Zwifu cɪga cɪga We yigə nɪ?

¹⁷ Kɔ daari nmu wɔlɔ na brɪ n titɪ nɪ n yɪ Zwifu tɪn, nmu yɛni n dalɪ We cullu tɪm yɪra nɪ mu, yɪ n kɪ tɪra dɪ n We tɔga kam.

¹⁸ Nmu manɪ n ye We wɔbɔŋa na lagɪ sɪ n kɪ kulɔ tɪn. Nmu na zaasɪ We cullu tɪm tɪn mu pɛ n lwarɪ wonɔ kulɔ na yɪ cɪga tɪn.

¹⁹ Nmu bɔŋɪ nɪ n jigi We pooni mu n paɪ balɔ ta na wɔ lim wɔnɪ tɪn, yɪ n nyɪ dɪ lilwe vanɪnɔ na lagɪ sɪ o pa nɔɔna tɔgi cwɛŋə te tɪn.

²⁰ Nmu maa n bɔŋɪ nɪ n jigi cwɛŋə sɪ n brɪ balɔ na ba jigi yɛno tɪn, sɪ n daari n zaasɪ balɔ wɔbɔŋa ta na wɔ bɪgi tɪn. We cullu tɪm na brɪ-m cɪga dɪ yɛno maama tɪn mu paɪ n bɔŋɪ kɔntɔ.

²¹ Nmu nan na yɛni n zaasɪ n donnɛ tɪn, bɛɛ mu kɪ yɪ n ba zaasɪ n titɪ? Nmu yɛni n brɪ nɔɔna nɪ ba yɪ taa ŋɔna, yɪ nmu titɪ ŋɔnɪ mu.

²² N tɛ nɪ ba yɪ kɪ boorim, yɪ nmu titɪ boori mu. Nmu culɪ jwɛnɛ, yɪ n laan daari n dɪ nyɔɔri ya baŋa nɪ.

²³ Nmu jɔgɪ tɪra dɪ Wɛ na kɪ Dɪ cullu tɪm n jɪŋa nɪ tɪn, yɪ n laan daari n kɪ n cɔgɪ Wɛ yɪrɪ dɪ n na ba sɛ Dɪ cullu tɪm na brɪ tɛ tɪn.

²⁴ Kɔ pɔpɔnɪ Wɛ tɔnɔ kɔm wɔnɪ kɔ wɪ: «Kɔ yɪ abam Zwifə bam kikiə ŋwaanɪ mu pai dwi-ge tiinə ŋɔɔnɪ ba cɔgɪ Wɛ yɪrɪ.»

²⁵ Abam yəni á goni á bəkəri sɪ kɔ brɪ nɪ á yɪ Wɛ nɔɔna mu. Á nan na kwaanɪ á sɛ Wɛ cullu tɪm, á bəkərigonim dɪm jɔgɪ kuri. Kɔ daari, á na cɔgɪ Wɛ cullu tɪm, á bəkəri sɪm gwəŋə yɪ kafɛ mu.

²⁶ Dwi-ge tiinə nan ba goni ba bəkəri. Ba wɔ nɔɔnɔ didɔa nan na tɔgɪ cɪga kalɔ Wɛ cullu tɪm na brɪ tɪn, kɔntɔ tu nyɪ dɪ wɔlɔ na goni sɪ kɔ brɪ nɪ o yɪ Wɛ nɔɔnɔ tɪn mu.

²⁷ Dwi-ge tiinə wɔ brɪ nɪ abam Zwifə bam ba jɔgɪ bɔra. Bɛŋwaanɪ á jɔgɪ Wɛ cullu tɔnɔ kɔm á jɪŋa nɪ, yɪ á goni á bəkəri. Nan dɪ kɔ dɪ, á ta yəni á cɔgɪ Wɛ cullu tɪm mu. Bantɔ nan ba goni ba bəkəri, yɪ ba nan tɔgɪ Wɛ cullu tɪm.

²⁸ Kɔ dai wɔlɔ na brɪ o tɪtɪ nɪ o yɪ Zwifu tɪn mu sɪnɪ o yɪ Zwifu cɪga cɪga Wɛ yigə nɪ. Kɔ nan ta dai nɪ wɔlɔ na goni tɪn mu sɪnɪ o yɪ Wɛ nɔɔnɔ.

²⁹ Wɛ yigə nɪ, Zwifu cɪga cɪga yɪ wɔlɔ Wɛ na ləni o bɪcarɪ tɪn mu. Wɔlɔ bɪcarɪ na fɔgɪ dɪ kwe tɪn mu nyɪ dɪ o goni mu cɪga cɪga. Wɛ cullu tɔnɔ kɔm bá wanɪ kɔ kwe nɔɔnɔ bɪcarɪ, kɔ nan yɪ Wɛ Jorokɔm mu wai kɔ kwe nɔɔnɔ bɪcarɪ. Nɔɔnɔ wɔntɔ doŋ nai zulə Wɛ tee nɪ mu, sɪ kɔ dai nabiinə tee nɪ.

3

Zwifu dwe dwi-ge tu Wɛ yigə nɪ na?

¹ Zwifə nan jıgı yu-yoŋo ba dwe dwi-geetiinə na? Zwifə na goni ba bəkəritın, kú jıgı zənə kú pa-ba na?

² Εεν, kú tiini kú jıgı kuri. Beŋwaanı dayigə tın, Zwifə bam mu yı balu We na kwe Dı ni-bitarı sum Dı kı ba jıŋa nı tın.

³ Ba badaara nan wu kı ba wu-dıdɔba dı We. Kuntu nan bá wanı kú pa We kwanı Dı ni-taanı dım.

⁴ Nɔɔna maama na maŋı ba yı vwa-nyına, We ta yı cıga tu mu. Kú puɔpuɔı We tɔnɔ kum wɔnı kú wı:

«Nmɔ We jıgı cıga

dı nmɔ na ŋɔɔnı taanı dıɔ maama tın.

Nɔɔna na maŋı ba co nmɔ dı,

nmɔ ta yı cıga tu mu.»

⁵ Kuntu ŋwaanı, dıbam na kı lwarım dıɔ tın ta na bri nı We yı cıga tu mu, dı wó ta nı beɛ? Kuntu wó pa nɔɔna taa te nı, We na pe ba na cam ba lwarım ŋwaanı tın, Dı wu kı cıga na?

⁶ Kú nan dai kuntu. We ya na dai cıga tu, Dı wó kı ta mu Dı di nabiinə taanı?

⁷ Nɔɔna ta wai ba te ba wı: «Amu na yəni a fɔ vwan tın, kú pe nɔɔna lwarı jaja nı We tiini Dı yı cıga tu, yı Dı na zulə kú ŋwaanı. Kú na yı kuntu, beɛ mu yı a maŋı sı a na cam a kəm-balwaarɔ tım ŋwaanı?»

⁸ Kuntu ya na yı cıga, dı ya wó wanı dı ta dı wı: «Pa-na dı taá tıŋı lwarım, sı kúv ja lanyıranı kú ba.» Nɔɔna badonnə yəni ba fɔ vwan ba pa amu ba wı, amu te kuntu doŋ mu. Ba nan lagı sı ba cɔgı amu yırı mu. Ba nan wó na cɔgım sı kú maŋı dı ba titɔŋa na yı te tın.

Nɔɔn-nɔɔnɔ tərə o na jigi ciga Wε yigə ni

⁹ Kɔ bri ni dɔbam Zwifə bam garɪ dwi-geetiinə bam mɔ na? Awo. A ya manɪ a ta ni nɔɔna maama wɔ lwarɪm gambɛɛm wɔni mɔ, kɔ na yɪ Zwifə naa dwi-ge tiinə bam dɪ,

¹⁰ ni kɔ na pɔpɔni Wε tɔnɔ kɔm wɔni kɔ wɪ: «Nɔɔn-nɔɔnɔ tərə o na jigi ciga Wε yigə ni, dɪ nɔɔnɔ dɪdɔba dɪ.

¹¹ Nɔɔn-nɔɔnɔ tərə o na ye kɔlɔ na manɪ tɪn.

Nɔɔn-nɔɔnɔ tərə o na lagɪ sɪ o lwarɪ Wε.

¹² Ba maama mɛ ba kwaga mɔ ba ya Wε, yɪ ba maama tusi.

Nɔɔn-nɔɔnɔ tərə o na kɪ lanyɪranɪ, dɪ nɔɔnɔ dɪdɔba dɪ.

¹³ Ba niə maa ŋɔɔri ni yibeelə niə na pɔri te tɪn. Ba maa mai ba dindəlimə ba ma ganɪ daanɪ. Ba niə ma cana ni bɪsankwɪ na jigi vian sɪ gɔɪ nɔɔna te tɪn.

¹⁴ Ba maa soolɪ wo-balwaarɔ ba pa nɔɔna.

¹⁵ Ba ma tiini ba duri lɪla ba ve ba gɔɪ nɔɔna.

¹⁶ Ba na dɛ jəgə kalɔ maama tɪn, ba yəni ba cɔgɪ wəənu mɔ yɪ ba ta yaari nɔɔna zanzan.

¹⁷ Ba maa yəri ywəəni cwəŋə sɪ ba tɔgɪ.

¹⁸ Ba maa bri ba ba kwarɪ Wε.»

¹⁹ Dɪ nan ye ni kɔlɔ maama Wε cullu tɔnɔ kɔm na bri tɪn, kɔ pɔpɔni kɔ pa balɔ cullu tɪm na te-ba tɪn mɔ. Kɔntɔ ŋwaanɪ, nabiinə maama wɔ ba ba zɪgɪ Wε yigə ni sɪ Dɪ di ba taanɪ, yɪ ba wɔlɔwɔlɔ bá wanɪ o ni o puri sɪ o ma ŋɔɔni o jɔŋi o tɪtɪ.

²⁰ Nɔɔn-nɔɔnɔ bá wanɪ o na ciga Wε tee ni, o na tɔgɪ Dɪ cullu tɪm tɪn ŋwaanɪ. Wε cullu tɪm nan paɪ nabiinə mɔ lwarɪ ni ba kɪ ba tusi.

Dí na wó na ciga We tee ni te tin

²¹ We laan nan pe dí lwarí DI na pai nɔɔna nau ciga DI tee ni te tin, yi ku wɔ zigi callu tɔgim baɲa ni. We callu tɔnɔ kum di We nijonɔ bam di nan maɲi ba bri cwəŋə kam kuntu.

²² Ku nan yi nɔɔna na ki ba wɔ-dɪdɪba di Zezi Kriɪ tin ɲwaanɪ mu We pai ba na ciga DI tee ni. Balɔ maama na ki ba wɔ-dɪdɪba di Zezi Kriɪ tin wó na ciga We tee ni, beɲwaanɪ nɔɔna maama yi biɔwɪ mu We yigə ni.

²³ Nabiinə maama ki lwarim mu yi ba daa wɔ maɲi di We paarɪ dɪm.

²⁴ We nan pai nɔɔna na ciga DI tee ni zaanɪ mu, Zezi Kriɪ na ɲwɪ ba lwarim junɪ o ma jonɪ-ba tin ɲwaanɪ. We pai nɔɔna DI zaanɪ dɪm kafe mu.

²⁵ DI ma pa Zezi ba o ji kaanum. O jana kam nunɪ ka ma vri nɔɔna ba lwarim wɔnɪ, di ba na ki ba wɔ-dɪdɪba did-o tin ɲwaanɪ. We ki kuntu mu si ku bri ni DI yi ciga tu mu. Faɲa faɲa tin, We deen ki wɔ-zuru mu yi DI wɔ vanɪ balɔ na ki lwarim tin zwa.

²⁶ Ku daari lele kuntu We pe dí lwarɪ ni DI yi ciga tu, di DI na jonɪ nɔɔna ba lwarim wɔnɪ tin. Kuntu maa bri ni We jigi ciga, yi DI ta pai balɔ maama na ki ba wɔ-dɪdɪba di Zezi tin di ta na ciga DI tee ni.

²⁷ Ku na yi kuntu, dí wó magɪ dí nyɔɔna beɛ baɲa ni mu? Kulɔkɔlɔ tərə. Beɲwaanɪ, ku dau dí na tɔgɪ We callu tum tin mu pe dí na ciga, ku yi dí na sɛ dí ki dí wɔ-dɪdɪba di Zezi tin ɲwaanɪ mu.

²⁸ Beɲwaanɪ dí ye ni nɔɔna wó na ciga We tee ni di ba na ki ba wɔ-dɪdɪba di DI tin mu, si ku

ɗai cullu tum tɔgum ŋwaanɩ.

²⁹ Baŋa-We yi Zwifə bam yiranɩ We mu na? DI ɗai dwi-ge tiinə bam dɩ We na? Eɛn, DI yi nabiinə maama We mu.

³⁰ We yi dɩɗva mu. Zwifə bam na kɩ ba wu-dɩɗva dɩ DI, DI wó pa ba na cɩga DI tee nɩ. Dwi-ge tiinə bam dɩ nan na kɩ ba wu-dɩɗva dɩ DI, DI wó pa ba dɩ na cɩga DI tee nɩ.

³¹ Kuntɔ nan ba lagɩ ku ta nɩ dí na kɩ dí wu-dɩɗva dɩ We tin, DI cullu tum daa ba jɩgɩ kuri. Dí na kɩ dí wu-dɩɗva dɩ We te tin laan paɩ DI cullu tum tiini ti jɩgɩ kuri mu.

4

Abraham na kɩ o wu-dɩɗva dɩ We yi o na cɩga DI tee nɩ te tin

¹ A pa dí nii dí nabaaru Abrahamdeen na yi te yi o na cɩga We tee nɩ tin.

² We ya na pe-o cɩga o na kɩ kəm-laaru tin ŋwaanɩ mu, o ya wó ta jɩgɩ wonjo si o magɩ o nyɔɔnɩ ku baŋa nɩ. O nan ba jɩgɩ wonjo si o magɩ o nyɔɔnɩ We yigə nɩ.

³ We tɔnɔ kum nan bri dɩbam ku wɩ: «Abraham kɩ o wu-dɩɗva dɩ We, yi We pa o na cɩga ku ŋwaanɩ.»

⁴ Ku nan na yi nɔɔnɩ na tɔŋɩ titɔŋɩ, o manɩ si o jonɩ o ŋwuru mu o titɔŋɩ dɩm ŋwaanɩ, kuntɔ nan ɗai peeri mu o jonɩ.

⁵ Ku daari nɔɔnɩ wulɩ na kɩ o wu-dɩɗva dɩ We, yi o ba tɩgɩ kəm-laaru tɩɩ o na kɩ tin, We wó pa kuntɔ tu na cɩga dɩ o na kɩ o wu-dɩɗva dɩ DI tin ŋwaanɩ. We mu yi wulɩ na yagɩ nɔn-balwaaru

lwarım DI ma ɛ-ba yɪ DI pa ba na ɔɣa DI tee nɪ tɪn.

⁶ Pɛ Davididɪ maɲɪ o ta kɔntɔ donɲ mɔ. O dɛɛn tagɪ o wɪ, nɔɔnɔ wɔɔɔ Wɛ na pɛ o na ɔɣa yɪ kɔ daɪ o kɛm-laarɔ ɲwaanɪ tɪn yɪ yu-yoɲo tu mɔ.

⁷ Davidi maa wɪ:

«Balɔ Wɛ na yagɪ ba wo-balwaarɔ DI ma ɛ-ba tɪn jɪɣɪ yu-yoɲo,

DI na saarɪ ba lwarım dɪm tɪn ɲwaanɪ.

⁸ Nɔɔnɔ wɔɔɔ na kɪ lwarım

yɪ Wɛ yagɪ DI ma ɛ-o yɪ DI daa ba kɪ-dɪ DI bɪcarɪ nɪ tɪn jɪɣɪ yu-yoɲo.»

⁹ Davidi na ɲɔɔnɪ wɔɔɔlo taanɪ dɪm kɔntɔ tɪn, o ɲɔɔnɪ balɔ na goni ba bɛkɛritɪn yɪranɪ ɲwaanɪ mɔ na? Aye. O ɲɔɔnɪ balɔ na ba goni ba bɛkɛri tɪn dɪ ɲwaanɪ mɔ. Dɪ maɲɪ dɪ lwarɪ nɪ: «Abraham kɪ o wɔ-dɪdɔba dɪ Wɛ mɔ, yɪ Wɛ pa o na ɔɣa kɔ ɲwaanɪ.»

¹⁰ Wɛ na pɛ o na ɔɣa DI tee nɪ kɔntɔ tɪn, kɔ yɪ maɲa kalɔ o na goni tɪn mɔ na? Awo, kɔ yɪ o ta na wɔ goni maɲa kalɔ tɪn mɔ.

¹¹ Kɔ yɪ kɔ kwaga nɪ mɔ Wɛ pɛ o go sɪ kɔ taa yɪ maana kɔ brɪ nɪ, Wɛ maɲɪ DI pa o na ɔɣa o na kɪ o wɔ-dɪdɔba dɪ DI tɪn ɲwaanɪ, kɔ loori o na wɔ go tɪn. Kɔntɔ, balɔ maama dɪ na wɔ goni yɪ ba kɪ ba wɔ-dɪdɔba dɪ Wɛ yɪ kɔ pa ba na ɔɣa DI tee nɪ tɪn, ba dɪ yɪ Abraham dɪwɪ tiinɛ ɔɣa ɔɣa mɔ.

¹² Balɔ maama dɪ na goni yɪ ba kɪ ba wɔ-dɪdɔba dɪ Wɛ tɪn yɪ Abraham dɪwɪ tiinɛ mɔ, yɪ kɔ nan daɪ ba na goni tɪn yɪranɪ mɔ ɲwaanɪ, kɔ yɪ ba na kɪ ba wɔ-dɪdɔba dɪ Wɛ tɪn ɲwaanɪ mɔ, nɪ Abraham

dɛɛn na kɪ o wɔ-dɪdɔvɑ dɪ Wɛ kɔ loori o na wɔ go maɲa kalɔ tɪn.

Wɛ goni Dɪ ni dɪ Abraham, o na kɪ o wɔ-dɪdɔvɑ dɪ Dɪ tɪn ɲwaani mɔ

¹³ Kɔ dɑɪ Abrahamna tɔgɪ Wɛ cullu tɪm tɪn ɲwaani mɔ pɛ Wɛ go Dɪ ni dɪ Abraham dɪ o dwi tiinɛ bam. Kɔ nan yɪ Abraham na kɪ o wɔ-dɪdɔvɑ dɪ Wɛ yɪ o na cɪga Dɪ tee nɪ tɪn ɲwaani mɔ pɛ Wɛ go ni Dɪ wɪ, Dɪ wɔ pa o ba o taa te lɔgɔ kɔm.

¹⁴ Kɔ nan ya na yɪ balɔ na tɔgɪ cullu tɪm tɪn mɔ wɔ ba ba taa te lɔgɔ kɔm, dɪ na kɪ dɪ wɔ-dɪdɔvɑ dɪ Wɛ te tɪn ya daa ba jɪgɪ kuri, yɪ Wɛ ni-gonim dɪm dɪ ya wɔ jɪ kafɛ mɔ.

¹⁵ Wɛ cullu tɪm vɔɔn mɔ paɪ Dɪ banɪ zaɲɪ dɪ nɔɔna, ba na cɔgɪ-tɪ tɪn ɲwaani. Cullu nan na tɛrɛ, nɔɔna bɑ wani ba cɔgɪ-tɪ.

¹⁶ Kɔntɔ, dɪ lwarɪ nɪ kɔ yɪ Abraham na kɪ o wɔ-dɪdɔvɑ dɪ Wɛ tɪn ɲwaani mɔ pɛ Wɛ go ni dɪdɔ, sɪ kɔ taa yɪ zaani pɛɛrɪ. Kɔntɔ tɪn, Abraham dwi tiinɛ bam maama wɔ sɪnɪ ba na wo-laaru tɪlɔ Wɛ na goni ni sɪ Dɪ pa-ba tɪn. Kɔ dɑɪ balɔ na tɔgɪ Wɛ cullu tɪm tɪn yɪranɪ mɔ wɔ na-tɪ, kɔ yɪ balɔ dɪ na kɪ ba wɔ-dɪdɔvɑ dɪ Wɛ nɪ Abraham dɪ dɛɛn na kɪ te tɪn mɔ. Kɔntɔ ɲwaani dɪbam maama wɔ wani dɪ bɛɲɪ Abraham nɪ dɪ nabaaru.

¹⁷ Wɛ dɛɛn tagɪ dɪ Abraham Dɪ wɪ: «Amɔ goni a ni sɪ a pa n jɪ dwi zanzan nabaaru mɔ.» Abraham na kɪ o wɔ-dɪdɔvɑ dɪ Wɛ tɪn, o sɪnɪ o jɪ dɪ nabaaru Wɛ yigɛ nɪ. Kɔ yɪ Wɛ dɪntɔ mɔ bi nɔɔna Dɪ pa ba yaɲɪ tɔɔnɪ, yɪ Dɪ pa woɲo maama kɪ maɲa kalɔ kɔlɔkɔlɔ ya ta na tɛrɛ tɪn.

18 Wε dεen na tagi dɪ Abraham Dɪ wɪ o dwi wó puli tɪn, Abraham ya yəri Wε na wó kɪ te Dɪ kɪ kɔntɔ. Dɪ kɔntɔ dɪ, o ta jɪgɪ tɪna lanyɪranɪ, yɪ o kɪ o wɔ-dɪdɔba dɪ Wε. Kɔntɔ ma pa o sɪnɪ o jɪ dwi zanzan nabaarɔ, nɪnɛɛnɪ Wε na tagi nɪ o dwi dɪm wó puli te tɪn.

19 Abraham dεen na gε fɪn sɪ o yi bɪna bi tɪn, o ma na nɪ o tiini o kwɪn zanzan, o daa bá wantɪ bu o lɔ. O ma na nɪ o kaanɪ Sara dɪ kwɪn zanzan o kε lɔra. Dɪ kɔntɔ maama o dεen ta kɪ o wɔ-dɪdɔba mɔ dɪ Wε.

20 O maa ba jɪgɪ bɔbwea dɪ Wε na goni Dɪ ni sɪ Dɪ pa-o kɔlɔ tɪn. O na kɪ o wɔ-dɪdɔba dɪ Wε tɪn, kɔ paɪ o zɪgɪ kɛŋkɛŋ, yɪ kɔ pa Wε na zulə.

21 O maa sɪnɪ o ye lanyɪranɪ nɪ, Wε wó wantɪ Dɪ kɪ kɔlɔ Dɪ na goni Dɪ ni sɪ Dɪ kɪ tɪn.

22 Kɔ yɪ kɔntɔ ηwaanɪ mɔ kɔ pɔpɔnɪ kɔ wɪ: «Wε ma pa o na cɪga dɪ o na kɪ o wɔ-dɪdɔba dɪ Dɪ tɪn ηwaanɪ.»

23 Kɔ nan na pɔpɔnɪ kɔ wɪ: «Wε ma pa o na cɪga» tɪn, kɔ dai Abraham yɪranɪ ηwaanɪ mɔ kɔ pɔpɔnɪ kɔntɔ.

24 Kɔ pɔpɔnɪ dɪbam dɪ ηwaanɪ mɔ. Bεηwaanɪ Wε wó pa dɪbam dɪ na cɪga Dɪ tee nɪ, dɪ dí na kɪ dí wɔ-dɪdɔba dɪ Dɪ tɪn ηwaanɪ. Dɪntɔ mɔ bi dí Yuutu Zezi Dɪ pa o yagɪ tɔbɪnɪ.

25 Wε nan mɔ kɪ Zezi nabiinə jɪŋa nɪ Dɪ pa o tɪ dɪbam lwarɪm ηwaanɪ. Dɪ ma daari Dɪ bi-o Dɪ pa o yagɪ tɔbɪnɪ o joori o na ηwɪa, sɪ kɔ pa dí na cɪga Dɪ tee nɪ.

5

Zezi na fɔgɪ dɪbam dɪ Wε daanɪ te tɪn

¹ Dí na kí dí wu-dídba dí Zezi tún mu pé dí na ciga Wε tee ní. Kuntu, díbam dí Wε fōgi daanu dí Yuutu Zezi Krisi ηwaaní mu.

² Zezi mu pé díbam yi Wε yigə, yi Wε kí díbam yu-yoŋo dí na kí dí wu-dídba dí-d-o tún ηwaaní. Kuntu tún, dí jigi tína ní dí wó na paari-zulə Wε tee ní, yi kú pai díbam jigi wupolo lanyiraní.

³ Dí nan ta jigi wupolo dí yaara yam wóni, beηwaaní dí ye ní yaara wai ya pai dí fōgi dí zigi dí pu-dia.

⁴ Dí pu-dia kam yaara yam wóni tún laan maa pa dí zigi kəŋkəŋ maŋum wóni. Dí na zigi kəŋkəŋ maŋum wóni tún laan maa pa dí jigi tína Wε tee ní.

⁵ Dí na jigi tína kuntu tún, kú bá pa dí na dí cavura, beηwaaní Wε tiini DÍ kí DÍ sono díbam bicara ní, dí DÍ na pé DÍ Jorokum wu díbam wóni tún.

⁶ Díbam na bwənə yi dí warí dí jōŋi dí títi tún, mu Zezi Krisi tíga o ma vri díbam na yi nɔn-balwaarv tún, maŋa kalv Wε wubɔŋa na lagi tún.

⁷ Kú cana sí nɔɔnɔ sɛ o tí o doŋ ηwaaní, dí o na wó tí wɔlv ηwaaní tún na maŋi o yi ciga tu te dí. Kú nan wai kú kí sí nɔɔnɔ bá kwarí fɔbni sí o tí nɔn-ŋum ηwaaní.

⁸ Kú nan na yi Baŋa-Wε, dinto bri díbam DÍ na tiini DÍ soe díbam te tún, dí DÍ na pé Zezi Krisi ba o tí díbam ηwaaní maŋa kalv dí ya ta na yi lwarim kərə tún.

⁹ Zezi na tíga yi o jana kam nuŋi tún mu pé dí na ciga Wε tee ní. Kú nan na dwe dídi tún, o laan wó jōŋi díbam Wε ban-zɔŋɔ kum wóni.

¹⁰ Díbam ya yi Wε duna mu. DÍ Bu wum tɔbni

dım nan mu pe dıbam dı We fıgı daanı. Ku nan na dwe dıdı, dıbam laan na jıgı We nıona tın, Dı Bu wım wı vrı dıbam, o na joorı o bı o yagı tıvı tın ıwaanı.

¹¹ Kulı ta na walı da tın, dı jıgı wıpolo lanyıranı dı We, dı dı Yuutu Zezi Krısi na pe dıbam dı We fıgı daanı tın ıwaanı.

Adam na vın We nı tın mu pe tıvı ba, Zezi maa ja ıwıa o ba

¹² Nabiinu dıdıba ıwaanı mu pe lwarım ba lıgı baıa, yı lwarım dı ja tıvı dı walı da dı ba. Kıntı tın, nabiını maama maı sı ba tı mu, ba maama na kı lwarım tın ıwaanı.

¹³ Ku na wı loori sı We kı Dı cullu tım Dı nıona bam jııa nı tın, dı lwarım maı dı wı lıgı baıa nı mu. Cullu tım nan ya ta na tıre tın, We ba jeelı nıona lwarım.

¹⁴ Ku na zıgı Adammaıa kam nı sı ku vu ku yı Moyısı maıa kam tın, tıvı ya maı dı wıra mu yı dı wı nabiını. Dı maa wı balı dı na kı ba tı sı, yı ku dı nı Adam deen na kı lwarım o vın We nı te tın.

Adam nan bı dıbam Zezi na lagı o ba tın nınyıgı mu.

¹⁵ Ba nan dı bıdı. Beıwaanı Adam deen na kı lwarım dı tın dı bıdı dı We na pe dıbam peeri dı zaanı tın. Nabiinu dıdıba kam kıntı lwarım dım ıwaanı mu pe nıona zanzan tı. We zaanı dım nan dwe kıntı, yı Dı tıı nabiinu dıdıba, wıntı mu yı Zezi Krısi, sı o kı nıona zanzan yu-yoıo ku ja gaalı.

¹⁶ We na pe peeri dım nıona zaanı kıntı tın, ku dı bıdı nı Adam na kı lwarım te tın.

Wɔntɔ na kɪ lwarɪm o vɪn Wɛ ni bɪdɔwɪ tɪn mu pɛ Wɛ di nɔɔna sariya. Kɔ daari nɔɔna zanzan na kɪ ba tusi tɪn, Wɛ pɛɛri dɪm nan pɛ ba lwarɪm zanzan ti yɪ ba na cɪga DI tee nɪ.

¹⁷ Nabiinu dɪdɔba kam lwarɪm ηwaani mu pɛ tɔbɔni tɔgi da di jaani nɔɔna. Kɔ nan na dwe dɪdi tɪn, balɔ maama Wɛ na kɪ-ba yu-yoŋo kɔ ja gaali, yɪ DI kwɛri DI pa ba na cɪga DI tee nɪ tɪn, mu wɔ ta ηwɪ Wɛ paari dɪm wɔni nabiinu dɪdɔba wɔlɔ na yɪ Zezi Kriisi tɪn ηwaani.

¹⁸ Dɪ nan lwarɪ nɪ Adam na kɪ o tusi bɪdɔwɪ tɪn mu pɛ nabiinɔ maama na cɔgɪm Wɛ tee nɪ. Zezi Kriisi yɪrani kɛm-laa kɔm di nan mu pɛ nɔɔna na cɪga yɪ ba jɪgi ηwɪa Wɛ tee nɪ.

¹⁹ Nabiinu dɪdɔba kam na vɪn Wɛ ni dɪm tɪn mu pɛ nɔɔna zanzan yɪ lwarɪm kɛrɔ. Nɔɔnɔ dɪdɔba kam na yɪ Zezi Kriisi tɪn nan na sɛ Wɛ ni tɪn di wɔ pa nɔɔna zanzan na cɪga Wɛ tee nɪ.

²⁰ Wɛ dɛɛn kɪ DI cullu tum nɔɔna jɪŋa nɪ, sɪ kɔ pa lwarɪm fɔgi di puli. Lwarɪm nan na puli kɔntɔ tɪn, Wɛ na kɪ nɔɔna zaani te tɪn wɔ tiini kɔ puli zanzan kɔ dwɛni.

²¹ Kɔntɔ tɪn, lwarɪm tɔgi tɔbɔni ηwaani mu di maa te nɔɔna. Wɛ zaani dɪm nan tɔgi DI na pa nɔɔna cɪga te tɪn ηwaani mu di maa di paari nɔɔna titari nɪ, sɪ ba taa jɪgi ηwɪa kalɔ na ba ti tɪn Wɛ tee nɪ dɪ Yuutu Zezi Kriisi ηwaani.

6

Dɪ na jɪgi Wɛ ηwɪ-dɔŋa kam Zezi Kriisi ηwaani te tɪn

¹ Dí nan wó ta ní bεε mu? Dí wó ta kí lwarim mu, sí kú waní kú pa Wε zaani dím tiini dí puli dí tee ní na?

² Aye, dí bá ta kí kuntu don. Kú na yí dí lwarim jəgə ní, díbam nyí dí twa mu. Kuntu tɪn, dí daa wó kí ta mu dí taá ηwí lwarim wóni?

³ Abam yəri ní, díbam balu maama ba na miisi na wóni Zezi Krisi yiri ηwaaní tɪn, kú brí ní dí tɔgí dí wəli díd-o o tɔbni dím wóni mu na?

⁴ Kuntu, ba na miisi díbam na wóni tɪn, kú nyí dí dí tígí díd-o mu yí ba kí díbam díd-o. Kuntu ma pa dí tɔgí dí Zezi Krisi dí ηwí Wε ηwí-dɔŋa kam, ní dí Kó Wε na mε DÍ paari dam dím DÍ ma bi Zezi DÍ pa o yagí tɔbni yí o na ηwía te tɪn.

⁵ Kuntu, díbam na tɔgí dí Zezi dí tí tɪn, dí laan jígí woŋo dídɔa mu díd-o, yí dí daa ta wó tɔgí díd-o dí bí dí yagí tɔbni.

⁶ Dí ye ní, ba na pagí Zezi tɔbni-dagarakam baŋa ní ba gú tɪn, díbam lwarim ηwí-donə kam dí tɔgí ka tí mu, kú pa lwarim daa warí díbam. Kuntu tɪn, dí laan te dí títi mu lwarim jɪŋa ní,

⁷ bɛŋwaani lwarim daa bá waní dí taa te wulu na tɔgí dí Zezi o tí tɪn.

⁸ Dí na tɔgí dí Zezi Krisi dí tí tɪn, dí jígí tɪna ní dí wó tɔgí díd-o dí na ηwía.

⁹ Bɛŋwaani dí ye ní Zezi Krisi bí o yagí tɔbni yí o daa bá joori o tí. Kuntu ηwaaní tɔbni daa ba jígí dam o baŋa ní.

¹⁰ Zezi na tígí kuntu tɪn, kú yí sí o cɔgí lwarim dam mu. O tígí bídwí yiraní mu o ma kweeli. O laan nan na ηwí tɪn, o ηwía kam zuli Wε mu.

¹¹ Kɔ yɪ kɔntɔ mɔ dɪ abam dɪ. Kɔ na yɪ dɪ lwarɪm jəgə nɪ, lwarɪ-na nɪ á nyɪ dɪ twa mɔ te. Kɔ nan na yɪ abam dɪ Wɛ laɲa nɪ, á ŋwɪ mɔ Zezi Kriisi ŋwaanɪ.

¹² Kɔntɔ ŋwaanɪ abam daa yɪ pa lwarɪm di dam á yɪra yalɔ na tɔ tɪn baɲa nɪ. Á nan yɪ sɛ á pa wo-balwaarɔ tɪlɔ á fra na zɔɔrɪ tɪn wanɪ abam.

¹³ Yɪ sɛ-na á pa lwarɪm taa te abam sɪ kɔ pa á taá kɪ kəm-balwaarɔ. Nan kwe-na á tɪtɪ á kɪ Wɛ jɪɲa nɪ, sɪ á nyɪ nɪ balɔ na tɪgɪ yɪ Wɛ pa á joori á bi á na ŋwɪa tɪn mɔ. Kwe-na á maama á pa Wɛ, sɪ Dɪ ma tɔɲɪ kulɔ na yɪ cɪga tɪn.

¹⁴ Lwarɪm daa ba te abam, bɛɲwaanɪ á na jɪgɪ ŋwɪa Wɛ tee nɪ tɪn, kɔ daɪ sɪ á taá ŋwɪ Dɪ cullu tɪm tɔgɪm ŋwaanɪ, kɔ yɪ Dɪ zaanɪ dɪm ŋwaanɪ mɔ.

Dí maɲɪ sɪ dí taá kɪ lanyɪranɪ mɔ maɲa maama

¹⁵ Kɔ nan brɪ dɪbam nɪ bɛɛ mɔ? Dí na jɪgɪ ŋwɪa Wɛ tee nɪ Dɪ zaanɪ dɪm ŋwaanɪ yɪ kɔ daɪ sɪ dí taá ŋwɪ Dɪ cullu tɪm tɔgɪm ŋwaanɪ tɪn, kɔ brɪ nɪ dí jɪgɪ cwəɲə sɪ dí taá kɪ lwarɪm mɔ na? Awo, kɔ daɪ kɔntɔ.

¹⁶ Á ye lanyɪranɪ nɪ, á na kwe á tɪtɪ á kɪ nɔɔnɔ jɪɲa nɪ sɪ á taá yɪ o gambe yɪ á sɛ o nɪ, á sɪnɪ á yɪ á na sɛ wɔlɔ tɪn gambe mɔ. Kɔntɔ tɪn, á na yɪ lwarɪm gambe, tɔɔnɪ laan mɔ wó ba dɪ ja abam. Á nan daa na yɪ balɔ na sɛ Wɛ ni tɪn, á wó na cɪga Dɪ tee nɪ.

¹⁷ A nan kɪ Wɛ le, dɪ abam dɛɛn ya na yɪ lwarɪm gambe yɪ á laan kwe á tɪtɪ á pa Wɛ cɪga kam zaasɪm yɪ á sɛ-ka dɪ á wɔ maama tɪn.

¹⁸ Wε mu vri abam lwarim juna ni, yi á laan ji DI ciga kam tintuna.

¹⁹ Abam wobuna ta na wu bigi tin mu pe a kwe nabiinə mumaŋa a ma maŋi a bri abam kuntu don. Abam deen kwe á maama mu á pa wodigiru di lwarim kikiə yi á yi ti gambe, yi á tɔŋi wo-lwaanu ku ja gaali. Lele kuntu, á laan nan maŋi si á kwe á maama mu á pa Wε ciga kam, si á taá yi ka gambe si á taá ŋwi di wu-pono.

²⁰ Abam deen na yi lwarim gambe tin, Wε ciga kam ya ba te abam.

²¹ Abam na ki wo-yɔɔru tɔɔ tin deen jigi beɛ nyɔɔri mu ti pa abam? Ti laan nan jigi cavura mu di abam. Wənu tintu kweelim je nan yi tɔɔni mu.

²² Ku daari lele kuntu Wε vri abam lwarim gambeem wɔni, yi á laan yi DI gambe-sonnu mu. Kuntu ŋwaanɪ á jigi nyɔɔri di á na ŋwi di wu-pono tin, yi ku kweelim je ni á wɔ na ŋwia kalu na ba ti tin Wε tee ni.

²³ Lwarim ŋwuru yi tɔɔni mu. Ku daari Wε pɛɛri dilu DI na pe dibam zaani tin mu yi ŋwia kalu na ba ti tin Wε tee ni, di na ŋwi di di Yuutu Zezi Krisi tin ŋwaanɪ.

7

Cullu tim daa ba te dibam

¹ A ko-biə-ba, á maama ye cullu laŋa na yi te. Kuntu ŋwaanɪ á ye ni cullu na te nɔɔnu, ku yi si ku taa ve o tɔɔni mu. O nan na tɔga, ti daa ba te-o.

² Ku nyi ni kaani na zu baru te tin mu. Culu bri ni o baru wum ta na ŋwi maŋa kalu tin, o ba

jigɔ cwəŋə sɪ o yagɪ o barɔ wɔm. O barɔ wɔm nan na tɪga, o laan jigɔ ni sɪ o zɔ barɔ wɔdon, culu daa wɔ vɔgɪ-ba daani.

³ Kɔntɔ ɲwaani, o barɔ wɔm ta na ɲwi, yɪ kaani wɔm na ve o zɔ barɔ wɔdon, o cɔgɪ mɔ. O barɔ wɔm nan na tɪga, culu kɔm daa wɔ vɔgɪ-ba daani. O laan na zɔ barɔ wɔdon, o daa wɔ cɔgɪ.

⁴ A ko-biə-ba, kɔ yɪ kɔntɔ mɔ dɪ abam dɪ. Kɔ na yɪ cullu tɪm laɲa ni, abam maama nyɪ dɪ twa mɔ te, Zezi Kriɪ na tɪgɪ tɪn ɲwaani. Kɔntɔ ma pa dɪ yigə lɪ cullu tɪm wɔni, yɪ dɪ jigɔ cwəŋə sɪ dɪ kɪ dɪ tɪtɪ nɔɔnɔ wɔdon jɲa ni, wɔntɔ yɪ Zezi wɔlɔ na bi o yagɪ tɔɔni tɪn. Kɔ maa paɪ dɪ tɔɲɪ tɪtɔɲ-ɲɔna dɪ pa Wɛ.

⁵ Dɪ dɛɛn kɪ wo-yɔɔrɔ tɪlɔ dɪ wɔbɔɲa na lagɪ tɪn. Wɛ cullu tɪm nan brɪ dɪbam kɔlɔ na yɪ lwarɪm tɪn, yɪ dɪ fra ta yəni ya zɔɔrɪ wəənu tɪm kɔntɔ. Kɔ dɛɛn ma pa dɪ kɪ kəm-balwaarɔ tɪlɔ na jigɔ dɪbam tɪ ve tɔɔni tɪn.

⁶ Cullu tɪm dɛɛn tiini tɪ pɪni dɪbam mɔ dɪ dam. Lele kɔntɔ tɪ nan daa ba te dɪbam, dɪ na tɔgɪ dɪ Zezi dɪ tɪ tɪn ɲwaani. Kɔntɔ tɪn, dɪ na tɔɲɪ Wɛ tɪtɔɲa yam te tɪn, kɔ yɪ Dɪ Jorokɔm na wɔ dɪ bɪcara ni tɪn ɲwaani mɔ. Dɪ laan tɔgɪ cwə-dɔɲa kam kɔntɔ, sɪ kɔ dai cwə-donə kalɔ na yɪ cullu tɪlɔ na pɔpɔni tɪ tɪɲɪ tɔnɔ wɔni tɪn ɲwaani.

Wɛ cullu tɪm brɪ dɪbam lwarɪm na yɪ te tɪn

⁷ Bɛɛ mɔ dɪ nan wɔ ta cullu tɪm laɲa ni? Tɪ yɪ lwarɪm mɔ na? Aye, kɔ dai kɔntɔ. Wɛ cullu tɪm nan mɔ pɛ a lwarɪ lwarɪm na yɪ te tɪn. Tɪ ya na wɔ brɪ ni: «Yɪ pa n yɪ zɔ n donnə wəənu», a

ya bá ta ye ni a yi na zu a donnə wəənu, ku yi lwarim mu.

⁸ Culu kum kuntu nan mu pe lwarim na cwəŋə di zu a wubunja ku pa a yi zu wəənu zanzan. Cullu nan na tərə, lwarim bá ta jigi dam.

⁹ A deen ya ta na yəri We cullu tum tin, a ŋwi mu a ya ba liə. A laan nan na tu a lwaru We cullu tum na bri kulɔ tin mu pe lwarim jigi dam a banja ni,

¹⁰ yi a nyi ni a tigi mu te. We cullu tɔɔ ya na maŋi si ti pa nɔɔna ŋwia tin laan pe tɔɔni mu ja-ni.

¹¹ Beŋwaanɔ, a na ni cullu tum tin mu pe lwarim laan na cwəŋə di ganɔ-ni, yi di tɔgi cullu tum ŋwaanɔ di pa tɔɔni ja-ni.

¹² Kuntu nan bri ni We cullu tum ba jigi lwarim mu. Ni dɔɔ maama We na pe dibam tin ba jigi lwarim. Di yi lanyiranɔ mu yi di jigi cigā.

¹³ Kuntu nan bri ni We cullu tɔɔ na lana tin mu jaanɔ a tɔɔni dim di ba na? Awo. Ku yi lwarim mu de We cullu tum di pa tɔɔni ja-ni. Kuntu ki si nɔɔna mu wanɔ ba lwaru lwarim na sunɔ di yi te tin. Cullu tum ma pa lwarim tiini di puli di bri di na yi balɔɔ te tin.

Lwarim dam na tɔŋi nabiinə wɔni te tin

¹⁴ Dí ye ni We cullu tum tɔgi Dɔ wubunja na lagɔ te tin mu. Amu nan yi lɔgɔ banja nabiinu mu, yi a yi lwarim gambaa.

¹⁵ A nan yəri wɔŋo kulɔ a na ki tin kuri. Amu yəni a ba ki kulɔ a na lagɔ tin, yi a laan daari a ki kulɔ a na culi tin.

¹⁶ A na yəni a ki kulɔ a na ba lagɔ si a ki tin, ku bri ni a se ni We cullu tum yi cigā mu.

17 Kuntɔ, kɔ daɪ nɪ a tɪtɪ mɔ paalɪ a kɪ wəənu tɪm kuntɔ, kɔ nan yɪ lwarɪm dɪlɔ na wɔ a wɔnɪ tɪn mɔ pa a kɪa.

18 A nan ye nɪ lanyɪranɪ təri a wɔnɪ, dɪ a na yɪ nabiinu yɪ a fra zɔɔrɪ lɔgɔ baŋa wo-yɔɔrɔ tɪn. Bɛŋwaanɪ, a na yəni a jɪgɪ wɔbɔŋa sɪ a kɪ lanyɪranɪ, a ta warɪ lanyɪranɪ wɔm a kɪ.

19 A yəni a ba kɪ lanyɪranɪ nɪ a wɔbɔŋa na lagɪ te tɪn, yɪ a laan daari a kɪ wo-balwaarɔ tɪlɔ a na ba lagɪ sɪ a kɪ tɪn.

20 A na yəni a kɪ kulɔ a wɔbɔŋa na ba lagɪ sɪ a kɪ tɪn, kɔ brɪ nɪ kɔ daɪ a tɪtɪ mɔ paalɪ a kɪ wəənu tɪm kuntɔ, kɔ yɪ lwarɪm dɪlɔ na wɔ a wɔnɪ tɪn mɔ paɪ a kɪa.

21 A nan lwarɪ kɔ na yəni kɔ kɪ amɔ te tɪn: A na yəni a bɔŋɪ sɪ a kɪ kulɔ na lana tɪn, kɔ yɪ lwarɪm yɪranɪ mɔ aá kɪ.

22 A tiini a jɪgɪ wɔpɔlɔ a bɪcarɪ nɪ dɪ Wɛ cullu tɪm.

23 A nan ye nɪ dam dɪdonɪ mɔ wɔ amɔ wɔnɪ, kɔ na lagɪ sɪ kɔ pa a taa tɔgɪ cwəŋə kalɔ na ba lana tɪn. Dam dɪm kuntɔ maa lagɪ sɪ dɪ cɔgɪ a wɔbɔŋa yam na lagɪ sɪ ya da cwə-ŋɔŋa kalɔ tɪn. Kuntɔ maa pɪnɪ amɔ, yɪ lwarɪm dɪlɔ na wɔ a wɔnɪ tɪn paɪ a ta tɔgɪ lwarɪm cwəŋə.

24 Lɛɛrɔ maa jɪgɪ-nɪ, lwarɪm dɪlɔ na wɔ a wɔnɪ tɪn na lagɪ sɪ dɪ pa tɔbɔnɪ ja-nɪ tɪn ŋwaanɪ. Wɔɔ mɔ wó wantɪ o vrɪ-nɪ o yagɪ?

25 Amɔ kɪ Wɛ le dí Yuutu Zezi Krisi ŋwaanɪ. Wɔntɔ mɔ wó jɔŋɪ-nɪ.

Kɔ na yɪ a wɔbɔŋa yam wɔnɪ, a sɛ Wɛ cullu tɪm mɔ. A nan na yɪ lɔgɔ baŋa nabiinu tɪn mɔ paɪ a tɔgɪ lwarɪm cwəŋə.

8

Wε Joro kum na pai dí ηwi di Wε te tin

¹ Kuntv tin, balv na ηwi di Zezi Kriſi tin, Wε daa bá di ba taani si DI cɔgi-ba.

² Wε Jorokum mu pai dí jigi ηwia Wε tee ni Zezi Kriſi ηwaanɪ. Wε Joro kum dam dɪm mu pe dí na vrim lwarim di tɔvni jɪŋa ni.

³ Dibam na yi nabiinɔ yi dí bwənɔ tin mu pai dí wari Wε cullu tim dí da. Kuntv ηwaanɪ dí daa bá wani dí na cɪga Wε tee ni DI cullu tim tɔgim ηwaanɪ. Woŋo kulv cullu tim na wɔ wani ti ki tin, Wε mu kia, di DI na tɔŋi DI titi Bu si o ba o ji nabiinu, yi o nyi di nabiinɔ balv lwarim na wai-ba tin. O ma ba o ti nabiinɔ lwarim ηwaanɪ, si o ma cɔgi lwarim na jigi dam dɪlv nabiinɔ baŋa ni tin.

⁴ Wε ki kuntv si kv pa dí na cɪga mu DI tee ni, si dí na cwəŋə dí ki kulv maama Wε cullu tim na bri ni kv manɪ tin. Beηwaanɪ dibam yi balv na tɔgi Wε Joro kum cwəŋə tin mu, si dí daa ba tɔgi wo-yɔɔrv tilv nabiinɔ fra na zɔvri tin.

⁵ Balv nan na tɔgi wo-yɔɔrv tim kuntv don tin tiini ba kwe ba wɔbɔŋa ba tiŋi wəənu tilv nabiinɔ wɔbɔŋa na lagɪ tin baŋa ni mu. Kv daari balv na tɔgi Wε Joro kum cwəŋə kam tin kwe ba wɔbɔŋa ba tiŋi wo-laarv tilv Wε Joro kum wɔbɔŋa na lagɪ tin baŋa ni mu.

⁶ Nɔɔnv wɔbɔŋa na tɔgi wo-yɔɔrv tilv nabiinɔ fra na zɔvri tin, tɔvni wɔ ja kuntv tu. Wɔlv wɔbɔŋa nan na tɔgi Wε Joro kum cwəŋə kam tin wɔ na ηwia Wε tee ni di wɔ-zuru.

⁷ Benwaani, nɔɔnɔ na tɔgi nabiinɛ wobuɔ-
yɔɔru tɪn, o yi We dum mu, o ba ki kulɔ We
niɛ yam na bri tɪn, o nan warɪ-ya dɪ o sɛ.

⁸ Balɔ maama na tɔgi wo-yɔɔru tɪlɔ nabiinɛ
wobuɔna na lagɪ tɪn bá wanɪ ba pa We wɔ poli.

⁹ Abam nan ba tɔgi nabiinɛ wobuɔ-yɔɔru na
lagɪ kulɔ tɪn. Á tɔgi We Jorokum na lagɪ kulɔ tɪn
mu, kɔ na wɔ á bɪcarɪ nɪ tɪn ɲwaani. Zezi Kriɪ
Joro kum nan na tɛri nɔɔnɔ wɔlɔ bɪcarɪ nɪ tɪn,
o dai Zezi nɔɔnɔ.

¹⁰ Zezi Kriɪ na wɔ á bɪcara nɪ tɪn, o Joro kum
mu pai á ɲwi dɪ We, á na nɛ cɪga Dɪ tee nɪ tɪn
ɲwaani. Á yɪra yam nan maɲɪ sɪ ya tɪ mu lwarɪm
dɪm ɲwaani.

¹¹ We mu bi Zezi Dɪ pa o yagi tɔnɪ. Kuntɔ
ɲwaani, Dɪ Joro kum na sunɪ kɔ wɔ á bɪcara nɪ,
We wɔ pa abam yɪra yalɔ na maɲɪ sɪ ya tɪ tɪn
jooɪ ya na ɲwia, Dɪ Joro kum na wɔ á bɪcara nɪ
tɪn ɲwaani.

¹² Kuntɔ, a ko-biɛ-ba, dí maɲɪ sɪ dí taá ɲwi nɪ
We Joro kum na lagɪ te tɪn mu, sɪ kɔ dai sɪ dí taá
tɔgi wo-yɔɔru tɪlɔ nabiinɛ wobuɔna na lagɪ tɪn.

¹³ Benwaani, á na tɔgi wo-yɔɔru tɪlɔ nabiinɛ
wobuɔna na lagɪ tɪn, tɔnɪ wɔ ja abam. Kɔ daari,
á nan na tɔgi We Joro kum dam ɲwaani á cɪ á
tɪtɪ dɪ kɛm-balwaarɔ tɪlɔ á fra na zɔurɪ tɪn, á wɔ
na ɲwia We tee nɪ.

¹⁴ Balɔ maama na pai We Joro kum bri-ba
cwɛɲɛ tɪn yi We biɛ mu.

¹⁵ Joro kulɔ We na ki á bɪcara nɪ tɪn ba pai
fɔnɪ jɪgi abam daga nɪ gambe te. We Joro kum
nan pai á yi We biɛ mu. Kɔ maa pai dí jɪgi cwɛɲɛ

sı dí bəŋi Wε nı Dí Ko Baba.

¹⁶ Wε Joro kum mu pai dibam jwæru tum lwarı nı dí sunı dí yı Wε biə mu.

¹⁷ Dí na yı Wε biə tın, dí wó ba dí na wo-laaru tılv maama Dı na tıŋi sı Dı pa Dı biə bam tın. Dí wó tɔɣı dı Dı Bu Zezi Krisi dí jonı kulv maama Wε na tıŋi sı Dı pa-o tın. Dí na tɔɣı dı Zezi dí na yaara, dí laan wó ba dí tɔɣı dıd-o dí na paarı zula.

Dı jıɣı tına nı dí wó na paarı-zula Wε tee nı

¹⁸ Amu ye nı dí na jıɣı yaara yalv lele tın bá wanı ya taa maı dı paarı-zula yalv dí na wó na Wε tee nı tın.

¹⁹ Wε na kı wænu tılv maama tın tiini tı lagı sı tı na de dım Wε na wó ba Dı brı Dı biə bam paarı-zula jaja tın.

²⁰ Wænu tılv maama Wε na kı tın tu tı daa ba jıɣı kuri. Ku nan dai wænu tum titı mu lagı kuntu. Ku yı Wε mu pe tı ji kafe, yı Dı nan pai tı ta jıɣı tına nı,

²¹ wænu tılv maama Dı na kı tın wó ba tı na vrım, sı tı daa yı cɔɣı nı tı zım na yəni tı cɔɣı te tın. Wε wó fɔɣı Dı kwe-tı sı tı laan ba tı taa jıɣı lam Dı tee nı, sı ku maŋı dı Dı biə bam na wó na paarı-zula yalv tın.

²² Dí nan ye nı wænu tılv maama Wε na kı tın jıɣı cam mu dı zım maama, nı kaanı na vri pugə yı o kını te tın.

²³ Ku nan dai wænu tum kuntu yıranı, ku yı dı dibam balv Wε na kı Dı Jorokum dí bıcara nı tın dı mu. Kuntu mu yı Wε dayigə pæri dılv na brı nı dí wó ba dí na Dı wo-laaru tum maama. Dibam dı nan kını mu, yı dí jıɣı tına dí cəɣı

maɲa kam Wε na wó pa dí ji DÍ títí sɔŋɔ biə, sɪ DÍ vrɪ dí yɪra yam yaara maama wɔnɪ.

24 Wε na vrɪ dɪbam tɪn mu paɪ dí jɪgɪ tɪna nɪ dí wó na kulɔ DÍ na wó pa dɪbam tɪn. Dí ya na maɲɪ dí na kulɔ dí na jɪgɪ tɪna ku ŋwaanɪ tɪn, dí ya daa bá ta jɪgɪ ku tɪna. Nɔɔn-nɔɔnɔ ba ta tɪnɪ kulɔ o na maɲɪ o na tɪn.

25 Dí nan ta jɪgɪ tɪna sɪ dí wó na Wε wo-laaru tɪlɔ dí ta na wɔ nε tɪn. Kuntɔ ŋwaanɪ mu dí zuri dí yɪra dí cɛgi tɪ maɲa kam.

26 Wε Joro kum dɪ nan wəli dɪbam, dí na bwənə tɪn ŋwaanɪ. Dɪbam yəri dí na wó loori Wε te sɪ ku maɲɪ tɪn. DÍ Joro kum nan loori-DÍ ku pa dɪbam dɪ ŋwana yalɔ na bá wanɪ ya ta dɪ nabiinə bɪtarɪ tɪn.

27 Wε nan ye dí bɪcara na yɪ te tɪn, yɪ DÍ kwəri DÍ ye DÍ Joro kum dɪ wɔbɔŋa na lagɪ kulɔ tɪn, bɛŋwaanɪ Wε Joro kum tɔgɪ Wε wɔbɔŋa na lagɪ te tɪn mu, yɪ ku loori Wε ku pa dɪbam balɔ na yɪ DÍ nɔɔna tɪn.

28 Dí ye nɪ balɔ na soe Wε yɪ DÍ bəŋi-ba nɪ DÍ na maɲɪ DÍ lɪ wɔbɔŋa te tɪn, DÍ kɪ-ba lanyɪranɪ wɔŋo maama wɔnɪ.

29 Wε dɛɛn maɲɪ DÍ jɪgɪ bantɔ wɔbɔŋa DÍ bɪcarɪ nɪ faɲa faɲa mu, yɪ DÍ daari DÍ kuri-ba sɪ ba laan ba ba taa nyɪ nɪ DÍ Bu wɔm na yɪ te tɪn. Kuntɔ ma wó pa Wε Bu Zezi na nyaana zanzan, balɔ dɪ na yɪ Wε biə yɪ ba saɲɪ o kwaga tɪn ŋwaanɪ.

30 Wε nan na maɲɪ DÍ kuri balɔ tɪn mu DÍ bəŋi sɪ ba taa yɪ DÍ nɔɔna. DÍ na bəŋi-ba kuntɔ tɪn, DÍ ma pa ba na cɪga DÍ tee nɪ. Balɔ DÍ na pε ba

na cıga kam tın mu Dİ pe ba na paarı-zulə Dİ tee ni.

Wε sono kum na tiini ku dagı te tın

³¹ Ku na yi kuntu tın, dı wú ta ni beε mu? Wε na wura dı dıbam tın, nɔɔnu wɔɔ mu wú wantı o cɔgi dıbam?

³² Wε nan wu vın sı Dİ tıtı Bu wum na yaara, yi Dİ se Dİ kı-o nabiinə jıɟa ni sı o tı dıbam maama ŋwaanı. Wε na pe dıbam Dİ Bu wum kuntu tın, Dİ ta wú kwe wo-laaru maama Dİ pa dıbam zaanı Dİ wəli da.

³³ Nɔɔn-nɔɔnu bá wantı o co dıbam balu Wε na kuri tın Dİ yigə ni. Beɟwaanı ku yi Wε tıtı mu pe dı na cıga Dİ tee ni.

³⁴ Nɔɔn-nɔɔnu bá wantı o pa dı ga buɾa Wε tee ni. Beɟwaanı ku yi Zezi Krisi tıtı mu tıgi dıbam ŋwaanı, yi o joori o bi o yagı tıvıni o jıgi ŋwıa Wε tee ni. O laan maa je Wε jazım ni yi o loori Wε o pa dıbam.

³⁵ Nɔɔn-nɔɔnu bá wantı o cɔgi dıbam dı Zezi Krisi sono kum daanı. Yaara mu wú wantı ya cɔgi dıbam dı Zezi Krisi sono kum na? Wu-cɔgo mu naa, beesa mu naa, kana mu naa, yinigə mu naa, cam dılu na wú ba tın mu naa, naa tıvıni mu? Awo, tı bá wantı tı cɔgi dıbam dı Zezi Krisi sono kum daanı.

³⁶ Ku pıpvıni Wε tɔno kum wıni ku wı: «Dıbam na yi nmu Wε nɔɔna tın mu paı dı tɔgi tıvıni wu dı ke de maama. Ba kwe dıbam ba ma ji ni peeni sılu ba na jıgi ba ve ba gu te tın mu.»

³⁷ Wε nan na soe dıbam tın, Dİ tiini Dİ paı dıbam wɔno wənu tım kuntu maama wıni.

38 Beḡwaanı amv ye lanyıranı nı kulvkvlv tərə kv na wú wanı kv cəgı dıbam dı Wε sono kum daanı. Kv na yı tıvni naa ḡwıa, naa kv na yı malesı naa weyuu tılampolo dıdeera bam maama, naa kv na yı zım wəənu naa jwa wəənu tılv na bıvni tın, naa wəənu tılv maama na jıgı dam nabiinə baḡa nı tın,

39 kv na yı wəənu tılv na jıgı dam weyuu tılampolo nı dı tılv na jıgı dam tıga kuri nı tın, naa wəənu tılv maama Wε na kı tın, tıntv maama wıvni kulvkvlv bá wanı kv cəgı dıbam dı Wε sono kum daanı, beḡwaanı kv yı sono kulv Wε na jıgı dı dıbam dı Yuutu Zezi Krisi ḡwaanı tın mv.

9

Wε na kuri balv sı ba taa yı Dı nōvna tın

¹ Amv na yı Zezi Krisi nōvıv tın, a ḡvıvni cıga mv sı kv dat vwan. Wε Jorokvıv na wv a bıcarı nı tın mv paı a ye nı kv sıvni kv yı cıga mv,

² dı a na brı nı a wv tiini kv cəgı yı a jıgı liə maḡa maama amv tıvı dıvı tiinə bam ḡwaanı dı ba na wv sε Zezi Krisi tın.

³ A ya wú ta lagı sı Wε cəgı amv tıvı Dı daarı Dı pōvıv-nı Zezi Krisi tee nı, dı kv na wú wanı kv pa a ko-bıə Zwıfə bam na vıvıv.

⁴ Ba yı Yısvırayelıdıvı tiinə mv. Kv yı bantv mv Wε deen pε ba jı Dı bıə, yı Dı pa-ba Dı paarı-zulə yam. Dı ma go nı nı Dı wú ta wvra dı ba, yı Dı daarı Dı kı Dı cullu tıvı ba jıḡa nı. Dı ma brı-ba ba na maḡı sı ba taa zıvı-Dı te tın. Dı ma daarı Dı go nıə dı ba.

⁵ Ba dwi dım kuri nuñi dıbam nabaaru Abrahamdwi dım wuntu mu. Ba na lugu Zezi Krisi lugu bana ni tin, ku yi bantı dwi dım wuntu mu ba lugo. Wuntu mu yi wənu maama Tu. O maa yi We yi o mañi di zulə sı ku taa ve maña kalı na ba ti tin. Amina.

⁶ A nan ba lugu a ta ni We na goni DI ni sı DI ku kulı tin jigi kafı. Beñwaanı ku dai ni Yisırayelı dwi tiinə bam maama mu sıni ba yi Yisırayelı tiinə cıga cıga We yigə ni.

⁷ Abraham dwi tiinə bam maama nan dai o biə cıga cıga We yigə ni. We deen tagı di Abraham DI wı: «Nmı bu Yizakı dwi dım yıranı mu wó ta yi n dwi tiinə cıga cıga.»

⁸ Ku brı ni We tee ni, ku dai biə balı maama Abraham na lugu tin mu yi We biə cıga cıga. Ku nan yi biə balı We na goni ni ba ñwaanı tin mu sıni ba yi DI biə cıga cıga.

⁹ Beñwaanı We deen goni ni DI wı: «Maña kam kuntu na joori ka yi, amı wó joori a ba di Saralugu bəkərə.»

¹⁰ Ku de kuntu mu yi dıbam nabaaru Yizakı kaanı Rabeka deen ja pugə o lu yiywa bale.

¹¹⁻¹² Maña kam Rabeka ta na wı lugu o biə bale bam yi ba daa ta yəri lanyıranı naa balıro tin, We deen tagı did-o DI wı: «Nakwı wım mu wó ta yi o nyaanı wım tintıñı.» Ku ku kuntu sı We na kuri-ba daanı te tin mu tıgi DI na mañi DI li wıbuña te tin. Ku brı ni We kurim dım tıgi DI na bəñi wılı sı o taa yi DI nıoñı tin mu, sı ku dai nıoñı wım titıña ñwaanı,

¹³ ni ku daa ta na pupıni We tıno kım wıni ku wı: «Amı soe Zakıbi, yi a daarı a yagi Ezayu.»

14 Dí nan wó ta ní bée mú? Dí bá waní dí ta ní Wé ba jigi ciga dí DÍ na kí te tìn.

15 Bèjwaaní Wé dèen tagí dí Moyisi DÍ wí:

«Amú wó ja nòònú wúlú ñwàña

a na lagí tìn mú,

yí a daari a duri nòònú wúlú yibwàñè

a na lagí tìn.»

16 Kuntú brí ní kú maama tógi Wé na jigi nòona ñwàña te tìn mú, sí kú dai nabiinè wúbùña na lagí kulú tìn naa ba títùña na yí te tìn ñwaaní.

17 Kú púpùní Wé tónò kúm wùní, ní Wé dèen tagí dí Ezípípa-farú wúm DÍ wí: «Amú pé n dí paari sí a waní a tógi nmú ñwaaní mú a brí nòona amú dam díím na mai te tìn, sí kú pa nòona taa zèñí amú yírí díím lúgú bàña maama ní.»

18 Kú brí ní Wé duri balú ñwàña DÍ na lagí tìn mú, yí DÍ daari DÍ pa badonnè ta kú ba wúrú ní DÍ na lagí te tìn.

Wé jigi ní sí DÍ kí DÍ wúbùña na lagí te tìn

19 Abam wú dídúá wai o bwe amú ní: «Kú na yí kuntú, bée mú yí Wé nan brí ní nòona kí ba cògi? Nòòn-nòònú nan bá waní o vín kulú Wé na lagí sí o kí tìn.»

20 Nabiinu yí wòò mú sí o waní o magí kantògò dí Wé? Kuntú tìn, kamògò wó waní kú bwe kú mòrú wúm ní: «Bée mú yí n mò-ní tuntu don?» na?

21 Bèjwaaní kamò-mòrú wúm jigi cwèñè sí o kwe dògò o ma mò kamwarú tìlú dwi maama o na lagí tìn. O wai o cè dògò kúm kuntú o maa mòòní kamògò sí kú taa yí lònú nyúm, yí o daari o mòòní kùdonj sí kú taa yí títùña nyúm.

²² Kɔ nan yɪ kɔntɔ mu dɪ Wɛ. Dɪ na lagɪ sɪ Dɪ brɪ nɔɔna Dɪ ban-zɔŋɔ kɔm dɪ Dɪ dam dɪm na maɪ te tɪn, Dɪ jɪgɪ cwəŋə sɪ Dɪ kɪ kɔntɔ. Dɪ nan pɪntɪ Dɪ banɪ mu dɪ balɔ na pɛ Dɪ banɪ zaŋɪ yɪ ba maŋɪ dɪ cɔgɪm tɪn,

²³ sɪ Dɪ daartɪ Dɪ pa nɔɔna balɔ Dɪ na jɪgɪ ba ŋwaŋa tɪn toɔgɪ ba na Dɪ paartɪ dɪm na tiini dɪ jɪgɪ zulə te tɪn. Bantɔ mu yɪ balɔ Dɪ na maŋɪ Dɪ lɪ sɪ ba zɔ Dɪ paartɪ zulə yam wɔntɪ tɪn.

²⁴ Kɔ nan yɪ dɪbam mu kɔntɔ. Wɛ mu kuri dɪbam nabiinə dwi maama wɔntɪ, yɪ kɔ daɪ Zwifə dwi dɪm yɪranɪ má wɔntɪ,

²⁵ nɪ kɔ na maŋɪ kɔ pɔpɔntɪ Oze tɔŋɔ kɔm wɔntɪ te tɪn. Wɛ dɛɛn tagɪ Dɪ wɪ:

«Nɔɔna balɔ ya na daɪ amɔ nɔɔna tɪn,
mu a laan wó bəŋi-ba nɪ amɔ nɔɔna.
Dwi tiinə balɔ amɔ ya na ba soe tɪn,
mu a laan wó bəŋi-ba nɪ amɔ nɔn-sonnu.»

²⁶ «Je sɪlɔ nɪ nɔɔ Wɛ ya na tagɪ dɪ ba Dɪ wɪ,
ba daɪ Dɪ nɔɔna tɪn,
kɔ yɪ dáanɪ mu ba laan wó bəŋi-ba nɪ
Nɔwɪa Tu Baŋa-Wɛ biə.»

²⁷ Ezayidɪ dɛɛn tagɪ Yisɪrayɛlɪtiinə bam taantɪ o wɪ:

«Yisɪrayɛlɪ tiinə bam na maŋɪ ba tiini ba daga
nɪ bugə nɪ kasɔllɔ na daga te tɪn,
ba finftɪn yɪranɪ mu wó na vrɪm.»

²⁸ Bɛŋwaantɪ Yuutu Baŋa-Wɛ bá daantɪ sɪ Dɪ kɪ kɔlɔ maama Dɪ na maŋɪ Dɪ lɪ wɔbɔŋa sɪ Dɪ kɪ tɪn lɔgɔ baŋa nɪ.»

²⁹ Kɔ ta yɪ nɪnɛɛntɪ Ezayi na maŋɪ o ta te o wɪ:
«Dam-fɔrɔ Tu Baŋa-Wɛ ya na wɔ daartɪ dɪbam
biə badaara Dɪ yagɪ,

sɪ kʊ pɑ dɪ dwi dɪm tɔŋj,
 dɪ jɑ wɔ tɪ mʊ,
 nɪ Sɔdɔmɔdɪ Gɔmɔɔrɪ tiinə bɑm dwi dɪm dɛɛn nɑ
 tɪ tɛ tɪn.»

³⁰ Dɪ nɑn wɔ tɑ nɪ bɛɛ mʊ? Dwi-geetiinə bɑlʊ yɑ
 nɑ bɑ kwaanɪ sɪ bɑ nɑ ɔɪgɑ Wɛ tee nɪ tɪn laan mʊ
 tʊ bɑ nɑ ɔɪgɑ Wɛ tee nɪ, bɑ nɑ kɪ bɑ wʊ-dɪdʊɑ dɪ
 Wɛ tɪn ŋwaanɪ.

³¹ Kʊ daari, Yisɪrayɛlɪ tiinə bɑm nɑ tiini bɑ
 kwaanɪ sɪ bɑ nɑ ɔɪgɑ Wɛ tee nɪ Dɪ cullu tɪm tɔgɪm
 ŋwaanɪ tɪn, bɑ wʊ nɛ.

³² Bɛɛ mʊ yɪ bɑ nɑn wʊ nɛ ɔɪgɑ Wɛ tee nɪ?
 Bantu yɑ bʊŋɪ sɪ bɑ nɑ ɔɪgɑ bɑ kəm-laaru tɪm
 ŋwaanɪ mʊ, yɪ kʊ dɑɪ nɪ bɑ kɪ bɑ wʊ-dɪdʊɑ dɪ
 Wɛ. Bɑ nɑ vɪn sɪ bɑ sɛ Wɛ kʊntʊ tɪn, kʊ mɑɑ nyɪ
 dɪ bɑ magɪ bɑ nɑgɑ mʊ dɪ kɑndwɛ dɪlʊ nɑ pɑ
 nɔɔnɑ tri bɑ tʊɪ tɪn,

³³ nɪ kʊ nɑ mɑŋɪ kʊ pʊpʊnɪ Wɛ tɔnɔ kʊm wʊnɪ
 kʊ wɪ:

«Nii-nɑ, amʊ Wɛ lagɪ a cwi kɑndwɛ mʊ Siyɔnnɪ.
 Dɪ mɑɑ yɪ kɑndwɛ dɪlʊ nɔɔnɑ nɑ wɔ magɪ bɑ tɪtɪ
 dɪ dɪ bɑ tʊ tɪgɑ nɪ tɪn.

Kʊ daari nɔɔnʊ wʊlʊ nɑ kɪ ɔ wʊ-dɪdʊɑ dɪ wʊlʊ
 nɑ yɪ kɑndwɛ dɪm kʊntʊ tɪn,

cavɪrɑ bɑ fɔgɪ yɑ jɑ kʊntʊ tʊ.»

10

¹ A kɔ-biə-bɑ, amʊ tiini a lagɑ sɪ Yisɪrayɛlɪ tiinə
 bɑm nɑ vrɪm, yɪ a yəni a loori Wɛ a pɑ-bɑ kʊ
 ŋwaanɪ.

² Amʊ wɔ wɑnɪ a pɑ ɔɪgɑ nɪ bɑ tiini bɑ lagɪ sɪ
 bɑ tʊŋɪ bɑ pɑ Wɛ, bɑ nɑn yəri cwəŋə kalʊ bɑ nɑ
 mɑŋɪ sɪ bɑ tɔgɪ tɪn mʊ.

³ Ba maa yəri cwəŋə kalɔ Wɛ na pɛ sɪ nabiinə tɔgɪ da ba ma na cɪga DI tee nɪ tɪn. Ba maa tɪŋɪ ba tɪtɪ cwəŋə sɪ ba maa na cɪga Wɛ tee nɪ, yɪ ba ba sɛ sɪ ba taa tɔgɪ cwəŋə kalɔ Wɛ na tɪŋɪ tɪn.

⁴ Zezi Krisi mɔ pɛ Wɛ cullu tɪm tɔgɪm cwəŋə kam laan ba ka kweeli, kɔ ma pa balɔ maama na kɪ ba wɔ-dɪdɔba dɪd-o tɪn laan na cɪga Wɛ tee nɪ.

Nɔɔnɔ wɔɔɔ maama na kɪ o wɔ-dɪdɔba dɪ Zezi tɪn wɔ na vrɪm

⁵ Moyisi dɛɛn pɔpɔnɪ nɔɔnɔ na wɔ kɪ te sɪ o ma na cɪga Wɛ tee nɪ DI cullu tɪm tɔgɪm ŋwaanɪ tɪn. O pɔpɔnɪ o wɪ: «Wɔɔɔ na kɪ Wɛ cullu tɪm na wɪ te tɪn wɔ na ŋwɪa kɔ ŋwaanɪ.»

⁶ Kɔ nan daa na yɪ nɔɔnɔ na wɔ kɪ te sɪ o ma na cɪga Wɛ tee nɪ o na kɪ o wɔ-dɪdɔba dɪ DI tɪn ŋwaanɪ, kɔ pɔpɔnɪ kɔ wɪ: «Yɪ zanɪ n bwe n tɪtɪ nɪnɛɛnɪ, wɔɔ mɔ wɔ wani o dɪ Wɛ-sɔŋɔ?» Kɔ lagɪ kɔ ta nɪ, sɪ o pa Zezi Krisi tu o ba o zəni dɪbam.

⁷ «Nan yɪ bwe n tɪtɪ nɪ, wɔɔ mɔ wɔ wani o tu curu?» Kɔ lagɪ kɔ ta nɪ, sɪ o pa Zezi bi o yagɪ tɔbɔnɪ sɪ o joori o ba.

⁸ Kɔ nan manɪ kɔ pɔpɔnɪ kɔ wɪ: «Wɛ taanɪ dɪm dai yigə yigə dɪ nmɔ, dɪ wɔ nmɔ ni nɪ dɪ n bɪcarɪ nɪ.» Kwərə kam kɔntɔ mɔ dɪbam tɔɔlɪ dɪ brɪ nɔɔna sɪ ba kɪ ba wɔ-dɪdɔba dɪ Zezi.

⁹ Kɔ tagɪ kɔ wɪ, nmɔ na tagɪ dɪ n ni nɪ Zezi mɔ yɪ wɔŋo maama Yuutu, yɪ nmɔ na sɛ n bɪcarɪ nɪ, sɪ Wɛ sɪnɪ DI bi-o DI pa o yagɪ tɔbɔnɪ, Wɛ wɔ vrɪ-m.

¹⁰ Bɛŋwaanɪ, kɔ yɪ nmɔ bɪcarɪ nɪ mɔ nɪ sɛ dɪ n wɔ-dɪdɔba yɪ n na cɪga Wɛ tee nɪ, yɪ nmɔ wɔ

ma n ni mu n ta jaja ni Zezi mu yi Yuutu, si n ma n na vrim.

¹¹ Ku pupuni We tonɔ kum wuni ku wi: «Wulu maama na ki o wu-didɔa did-o tin, cavura bá ja kuntu tu.»

¹² Kuntu, ku yi bidwi mu di noona maama, ku na yi Zwifə di dwi-ge tiinə bam di. Ba maama Yuutu yi didɔa mu, yi wuntu mu yəni o pai balu maama na loor-o tin zənə zanzan.

¹³ Beɲwaani, «wulu maama na loori zənə dí Yuutu wum yiri ɲwaani tin wú na vrim.»

¹⁴ Ku nan na yi kuntu tin, noona wú ki ta mu ba loori zənə o tee ni, yi ba wu ki ba wu-didɔa did-o? Ba nan wú ki ta mu ba ki ba wu-didɔa did-o, yi ba wu ni o kwərə? Ba nan wú ki ta mu ba ni o kwərə yi noon-noonu wu tooli-ka o bri-ba?

¹⁵ Noonu nan wú ki ta mu o vu o tooli We kwərywəɲə kam o bri-ba di ba na wu tɔŋ-o? Ku nan pupuni We tonɔ kum wuni ku wi: «Balu na beeri ba tooli We kwərywəɲə kam ba bri noona tin vəɲə jigi wɔpolo mu.»

¹⁶ Ku nan dai ni noona maama mu se We kwərywəɲə kam. Ezayideen tagi o wi: «Yuutu Banja-We, wɔɔ mu jonji dibam ni-taani dim?»

¹⁷ Kuntu ma bri ni noona zwa na ni kulɔ tin, mu ba ki ba wu-didɔa di ku. Taani dilu ba nan na wú ni tin mu yi Zezi Krisi kwərə kam.

¹⁸ Amu lagi a bwe a nii, Yisrayeli tiinə bam wu ni We kwərə kam mu na? Ku yi ciga ba ni-ka, ni We tonɔ kum na tagi ku wi:

«Ba tooli o kwərə kam lugu banja je maama, yi ba ni-taani jagi di yi je maama.»

19 Amu ta lagı a bwe a nii, Yisırayelı tiinə bam sını ba wu ni We taanı dım kuri mu na? Ba niə. Dayigə tın, We deen tođı Moyisiŋwaanı mu DI ta dı ba DI wı:

«Amu wú pa abam taá jıgı wu-guu dı dwi tiinə balu na dai amu noona tın.

Amu wú pa abam bana zanı dı noona balu na yəri kulukulu tın.»

20 Kuntu kwaga ni Ezayi deen ne baarı yi o ta o wı:

«Noona balu ya na ba buŋı sı ba ba ba se amu We tın,

bantu laan mu tu ba se amu.

Amu pe balu na maŋı ba wu bwe amu bwiə tın mu ba ba lwarı amu.»

21 Ku nan na yi Yisırayelı tiinə bam, We tagı DI wı:

«De maama wunı amu te a jıa sı a ma jonı abam, yi á vın sı á ba amu te.»

11

We wu yađı Yisırayelı tiinə bam

¹ Kuntu tın, amu ta lagı a bwe a nii, We vın DI titı noona Yisırayelıtiinə bam mu na? Aye! Ku dai kuntu. Amu titı dı yi Yisırayelı dwi tu mu. A yi Abrahamnaa mu, yi a nunı Benzamendwi dım wunı.

² We wu vın DI noona balu DI na maŋı DI kuri pulim ni tın. Abam nan maŋı á ye We tɔnɔ kum na tagı Eli taanı te, dı o na warı We o ta Yisırayelı tiinə bam na kı te yi ku wu maŋı tın.

³ O deen warı We o wı: «Yuutu Baŋa-We, ba gu nmu nijonə bam maama, yi ba daarı ba cɔgı

nmv kaanum bimbine yam. Kɔ laan daari amv yirani mv, yi ba kwaani si ba gv amv di.»

⁴ We nan lar-o DI wi beɛ mv? DI deen wi: «Amv li nɔɔna murr-tirpe mv (7.000), si ba taa yi amv titi nɔɔna. Bantv ta wv fɔgi ba kuni doonɔ ba zuli Baal.»

⁵ Kɔ nan ta yi bidwi mv di zɔm maama. Nɔɔna finfin ta mv daari, We na togi DI zaani dim ηwaanɔ DI kuri-ba tin.

⁶ We de DI zaani dim ηwaanɔ mv DI kuri-ba, si kɔ dai ba titɔη-ηɔna ηwaanɔ. Kɔ ya na yi ba titɔη-ηɔna ηwaanɔ mv We kuri-ba, kɔ ya daa bá ta yi DI zaani dim DI na pe-ba tin ηwaanɔ.

⁷ Kɔ brɔ ni Yisrayeli tiinɔ bam wv ne cɔga kalɔ ba na kwaani si ba na We tee ni tin. Nɔɔna balɔ We na kuri tin nan mv ne-ka. Balɔ na daari tin bicari digili.

⁸ Kɔ maa ki-ba ni kɔ na pɔpɔni te We tɔnɔ kum wɔni kɔ wi:

«We mv pe ba wɔbɔηa ti,

yi ba daa ba ni kulɔkulɔ kuri.

Di zɔm maama, ba yiɔ ta ba nai,

yi ba zwa di kwarɔmi di We cɔga kam.»

⁹ Davididi deen tagi ba taani o wi:

«We wɔ pa ywæni dilɔ ba na bɔηi si ba di tin pipiri di ji wɔηɔ kulɔ na wɔ ja-ba kɔ cɔgi, ni cɔkɔ na jaani-ba te tin.

Kɔ maa wɔ pa We pa ba na cam yi ba tv tɔga ni.

¹⁰ We wɔ pa ba yiɔ dwe yi ba daa bá ta nai.

DI maa wɔ pa ba yira ce di yaara taan, maηa maama.»

¹¹ Amv ta lagɔ a bwe a nii, Yisrayeli tiinɔ bam na tri ba tv kɔntv tin, kɔ brɔ ni ba daa bá wani ba

zanɪ ba joori ba fɔɔɔɔ dɪ Wɛ mʊ na? Aye! Bantʊ na vɪn Wɛ cɪga kam te tɪn mʊ pɛ dwi-geetiinə wanɪ ba na vrɪm Wɛ tee nɪ. Wɛ kɪ kʊntʊ sɪ kʊ pa Yisɪrayelɪ tiinə bam mʊ taa jɪɔɔ wʊ-gʊʊ dɪ ba.

¹² Yisɪrayelɪ tiinə bam na kɪ ba cɔɔɔɔ tɪn mʊ pɛ nabiinə maama wanɪ ba na zənə lanyɪranɪ Wɛ tee nɪ. Bantʊ na gɛ kʊlʊ ba na maɪɪ sɪ ba na tɪn mʊ pɛ dwi-ge tiinə na cwəɲə ba jɔɲɪ Wɛ zənə yam. Kʊ brɪ nɪ Yisɪrayelɪ tiinə kɔɔɔ kʊlʊ na wʊ ba tɔɔɔ Wɛ tɪn na pulɪ kʊ ti, kʊʊ pa nɔɔna na Wɛ zənə zanzan kʊ ja gaalɪ.

Wɛ na vrɪ dwi-ge tiinə te tɪn

¹³ Kʊ yɪ dɪ abam dwi-geetiinə mʊ a lagɪ a ta taanɪ dɪntʊ. Amʊ na yɪ Zezi tuntʊɲnʊ sɪ a taa tɔɔlɪ o kwərə kam a brɪ dwi-ge tiinə tɪn, a brɪ nɪ kʊ tiini kʊ yɪ tɪtʊɲ-kamunu mʊ.

¹⁴ Amʊ kwaanɪ a tʊɲɪ sɪ kʊ pa wʊ-gʊʊ mʊ ja a donnə Yisɪrayelɪtiinə bam, sɪ kʊ wanɪ kʊ pa Wɛ vrɪ ba badonnə amʊ tɪtʊɲa yam ɲwaanɪ.

¹⁵ Wɛ na yagɪ bantʊ tɪn, kʊ pɛ lʊgʊ baɲa dwi tiinə maama laan ba ba fɔɔɔɔ dɪ Wɛ. Kʊ daari maɲa kalʊ Wɛ na wʊ joori Dɪ jɔɲɪ-ba tɪn, kʊʊ ta nyɪ dɪ twa na joori ba na ɲwɪa te tɪn mʊ.

¹⁶ Dɪ ye nɪ, nmʊ na dɛ yigə n fɔ dɪpɛ n tiɲɪ Wɛ ɲwaanɪ, dɪlʊ maama na daari tɪn daa ta yɪ Wɛ nyɪm mʊ. Tiu kuri na yɪ Wɛ nyɪm, kʊ nɛ sɪm maama dɪ yɪ Wɛ nyɪm mʊ.

¹⁷ Yisɪrayelɪ tiinə bam nyɪ dɪ Olivitiu ba na jəri gaari wʊnɪ te tɪn mʊ. Kʊ yɪ nɪnɛɛnɪ Wɛ mʊ goni tiu kʊm kʊntʊ nɛ sɪdaara Dɪ yagɪ, yɪ Dɪ daari Dɪ kwe Olivi tiu kʊlʊ na wʊ gaa wʊnɪ tɪn nɛ Dɪ tɔɲɪ Dɪ gwaanɪ nɛ sɪdonnə sɪm wʊnɪ. Abam balʊ na

yɪ dwi-ge tiinə tɪn nyɪ dɪ nɛ sɪlv ba na tonji tɪn mʊ. Sɪ laan ma wəri yɪ sɪ toɟɪ sɪ naɪ tiu kʊm kugu kʊm nyɔa kam.

¹⁸ Kʊntʊ ɲwaanɪ, nmʊ yɪ ta n gooni nɛ sɪlv ba na goni ba yagɪ tɪn. Nmʊ na brɪ n tɪtɪ kʊntʊ, ta n ye sɪ kʊ daɪ nmʊ mʊ paɪ tiu kʊm kugu kʊm zɪga. Kʊ yɪ kugu kʊm mʊ jɪɟɪ nmʊ.

¹⁹ Nmʊ nan wai n tɛ nɪ: «Wɛ goni nɛ sɪm kʊntʊ Dɪ yagɪ, kʊ daari sɪ amʊ mʊ na jəgə a tonji tiu kʊm yɪra nɪ.»

²⁰ Kʊ sɪnɪ kʊ kɪ kʊntʊ mʊ. Wɛ nan goni nɛ sɪm kʊntʊ Dɪ yagɪ, ba na wʊ kɪ ba wʊ-dɪdʊa dɪ Dɪ tɪn ɲwaanɪ mʊ. Nmʊ nan na wanɪ n tonji tiu kʊm yɪra nɪ tɪn, kʊ yɪ n na kɪ n wʊ-dɪdʊa dɪ Wɛ tɪn ɲwaanɪ mʊ. Nan yɪ zanɪ n ta n kɪ kamunni, za n ta n kwarɪ Wɛ.

²¹ Bɛɲwaanɪ, Wɛ na wʊ sɛ sɪ Dɪ yagɪ tiu kʊm tɪtɪ nɛ sɪm sɪ je nɪ tɪn, nmʊ dɪ na ba jɪɟɪ wʊ-dɪdʊa dɪ Dɪ, Dɪ bá yagɪ-m da.

²² Kʊ maama nan brɪ Wɛ na kɪ nɔɔna lanyɪranɪ te, yɪ Dɪ daari Dɪ vanɪ nɔɔna zwa te tɪn mʊ. Kʊ na yɪ balʊ na kɪ ba cɔɟɪ tɪn, Dɪ vanɪ ba zwa mʊ. Kʊ daari, nmʊ nan na wʊ yagɪ Wɛ cwəɲə kam toɟɪm, Dɪ wʊ ta kɪ nmʊ lanyɪranɪ. Nmʊ nan na yagɪ Wɛ cwəɲə kam, Dɪ laan wʊ go nmʊ dɪ Dɪ yagɪ mʊ nɪ tiu naga te.

²³ Yisurayelɪ tiinə bam nan na kɪ ba wʊ-dɪdʊa ba sɛ Wɛ, baá joori ba na ba jəgə kam. Wɛ wʊ wanɪ Dɪ joori Dɪ tonji-ba da.

²⁴ Kʊntʊ tɪn, nmʊ wʊlv na yɪ dwi-ge tu tɪn nyɪ dɪ naga kalʊ Wɛ na goni Olivi tiu kʊlv na wʊ gaa wʊnɪ tɪn yɪra nɪ mʊ. Dɪ ma pa nmʊ tonji Olivi tiu kʊlv na wʊ gaari wʊnɪ tɪn yɪra nɪ, yɪ kʊ daɪ nɪ

nɔɔna na yəni ba kɪ te tɪn. Kuntɔ ɲwaanɪ kɔ bá ta cana dɪ Wɛ sɪ Dɪ joori Dɪ tonɪ nɛ sɪlɔ Dɪ ya na goni tɪn sɪ tɪtɪ kugu kɔm je nɪ.

Wɛ jigi nɔɔna maama ɲwanɲa sɪ Dɪ vrɪ-ba

²⁵ A ko-biə-ba, amɔ lagɪ sɪ á lwarɪ Wɛ cɪga kalɔ dɛɛn na sɛgi tɪn mɔ. Abam na sɪnɪ á lwarɪ kuntɔ, á daa bá ta bɔɲɪ nɪ á yɪ swan tiinə. Kɔ na yɪ te tɪn, lele kuntɔ Yisɪrayɛlɪtiinə badaara wɔrɔ digili yɪ ba warɪ Wɛ cɪga kam kuri ba nɪ. Kɔ nan wó ta yɪ kuntɔ, sɪ kɔ vu kɔ yɪ maɲa kam dwi-geɪtiinə balɔ na sɛ Wɛ tɪn kɔgɔ kɔm na wó puli kɔ ti tɪn.

²⁶ Kuntɔ, Yisɪrayɛlɪ tiinə kɔgɔ kɔm maama laan wó na vrɪm, nɪ kɔ na pɔpɔnɪ Wɛ tɔnɔ kɔm wɔnɪ kɔ wɪ:

«Wɔlɔ na paɪ nɔɔna na vrɪm tɪn wó nuɲi Siyɔnnɪ o ba,

yɪ oó pa Zakɔbɪdwi tiinə bam lwarɪm dɪm ti.

²⁷ Amɔ Wɛ wó go ni dɪntɔ a pa-ba, nɪ amɔ wó saarɪ ba lwarɪm dɪm a yagɪ.»

²⁸ Yisɪrayɛlɪ tiinə bam na vɪn Wɛ kwɛr-ywəɲə kam tɪn, ba jigi Wɛ dɔna mɔ, yɪ kuntɔ laan pa abam dwi-geɪ tiinə bam na vrɪm Wɛ tee nɪ. Kɔ daarɪ, kɔ na yɪ Wɛ na kuri nɔɔna sɪ ba taa yɪ Dɪ nɔɔna te tɪn laɲa nɪ, Dɪ soe Yisɪrayɛlɪ tiinə bam, Dɪ dɛɛn na goni nɪ dɪ ba nabaara bam tɪn ɲwaanɪ.

²⁹ Wɛ nan ba kɪ a ya na maanɪ, dɪ Dɪ na kuri nɔɔna yɪ Dɪ kɪ-ba lanyɪranɪ te tɪn.

³⁰ Abam dwi-geɪ tiinə dɛɛn ya vɪn Wɛ mɔ, yɪ á laan ba á lwarɪ Dɪ yibwɛn-durə kam, Yisɪrayɛlɪ tiinə bam na vɪn Wɛ tɪn ɲwaanɪ.

³¹ Bantv dı laan tu ba vın We ni, yı abam na We yibwənə kam, sı kú wanı kú pa bantv dı laan ba ba lwarı Dı yibwən-durə kam na yı te tın.

³² We nan pe nɔɔna maama nyı nı ba wu puına digə nı mu te, ba na vın Dı ni tın ɲwaanı, sı Dı laan wanı Dı duri ba maama yibwənə.

³³ Maanı-na á nii We zaanı dım na tiini dı dagı te.

We wubɔɲa dı Dı yəno kum dı ma tiini kú lirə. Nɔɔn-nɔɔnv bá wanı o lwarı Dı na ı wubɔɲa sı

Dı kı te tın,

naa o lwarı cwe sılv Dı na tɔɟı tın,

nı kú na puɔpuı We tɔnɔ kum wɔnı kú wı:

³⁴ «Nɔɔn-nɔɔnv bá wanı o lwarı Baɲa-We wubɔɲa,

naa o brı-Dı Dı na wú kı te tın.

³⁵ Nɔɔn-nɔɔnv bá wanı o kwe o wɔɲo o jıı We.»

³⁶ Beɲwaanı wəənu maama nuɲı We te mu,

yı dıntv mu nii ti maama baɲa nı,

yı ti maama yı dıntv nyım mu.

We maɲı dı zulə mu, sı kú taa ve maɲa kalv na ba ti tın. Amina.

12

We nɔɔna na maɲı sı ba taa ɲwı te tın

¹ A ko-biə-ba, We na tiini Dı jıɟı abam ɲwanı kuntu tın, a loori abam sı á kwe á tıti á pa We nıɲɛni ba na me wɔɲo ba kı kaanı ba pa We tın, sı á taá ɲwı dı wu-poɲo, sı kú poli We wu lanyıranı. Kuntu mu yı zulə yalv na maɲı sı á pa We tın.

² Á yí pa á wɔbɔŋa taa tɔgi balɔ na yəri Wɛ tɪn cwe sɪm. Kwaanɪ-na sɪ Wɛ pa á taá jɪgi wɔbɔŋ-dɔɔra, sɪ kɔ ləni á ŋwɪa kam maama. Abam laan wó ba á lwarɪ Wɛ wɔbɔŋa na lagɪ sɪ á kɪ kɔlɔ tɪn, yɪ á wó lwarɪ nɪ kɔ tiini kɔ lana cɪga cɪga yɪ kɔ poli DI wɔ.

³ Wɛ na kɪ-nɪ yu-yoŋo sɪ a taa yɪ DI tɪntɔŋɔ tɪn, a lagɪ a ta dɪ abam maama sɪ á yɪ taá bɔŋɪ kamunni á pa á tɪtɪ, nɪ á dwe á na maŋɪ á yɪ te tɪn. Á nan taá jɪgi wɔbɔŋ-ŋɔna, sɪ kɔ maŋɪ dɪ Wɛ na pɛ abam dɪdɔa dɪdɔa pɛɛrɪ te á na kɪ á wɔ-dɪdɔa dɪ DI tɪn ŋwaanɪ.

⁴ Nabiinu yɪra yɪ woŋo dɪdɔa mɔ, yɪ ya laan pɔɔrɪ je dwi təri təri. Jəgə maama nan jɪgi ka tɪtɔŋa mɔ yɪra yam wɔnɪ.

⁵ Kɔ nan yɪ bɪdwɪ mɔ dɪ dɪbam balɔ dɪ na ŋwɪ dɪ Zezi Krisi tɪn. Dí tiini dí daga, yɪ dí nan yɪ kɔgɔ dɪdɔa mɔ. Dɪbam maama dɪdɔa dɪdɔa maa tɔŋɪ dí wəli daanɪ, nɪ yɪra yam je sɪm dwi təri təri na tɔŋɪ sɪ zəni daanɪ te tɪn.

⁶ Wɛ-pɛera yalɔ DI na pɛ dɪbam tɪn yɪ dwi təri təri mɔ, nɪ DI na pɛ dɪbam zaanɪ te tɪn. Wɛ na pɛ wɔlɔ wai o ŋɔɔnɪ yɪyɪu-ŋwɛ tɪn, kɔntɔ tu maŋɪ sɪ o taa tɔgi o na jɪgi wɔ-dɪdɔa dɪ Wɛ te tɪn mɔ o ma ŋɔɔnɪ-sɪ.

⁷ Wɛ na pɛ wɔlɔ wai o tɔŋɪ o wəli o donnə tɪn, kɔntɔ tu maŋɪ sɪ o taa tɔŋɪ kɔntɔ mɔ. Wɔlɔ Wɛ na pɛ o wai o brɪ o donnə Wɛ cɪga kam tɪn, sɪ o dɪ kwaanɪ o taa brɪ-ka.

⁸ Wɛ na pɛ wɔlɔ wai o kwe nɔɔna sɪ ba na baarɪ tɪn maŋɪ sɪ o taa kɪ kɔntɔ mɔ. Wɔlɔ dɪ na cɛ o wəɛnu o maa zəni o donnə tɪn maŋɪ sɪ o ma o wɔ-yoŋo mɔ o wəli-ba lanyɪranɪ. Wɔlɔ nan na

yí nɔɔna yigə tu tɪn maŋɪ sɪ o kwaanɪ o taa bri-ba cwəŋə lanyɪranɪ. Wɔlɔ nan na duri o donnə yibwənə tɪn maŋɪ sɪ o taa kɪ-kɔ dɪ wɔpɔlo mɔ.

⁹ Á taá soe daanɪ dɪ cɪga. Á taá culi wo-lwaanɔ dwi maama, sɪ á daari á taá kɪ kɔlɔ maama na lana tɪn.

¹⁰ Á na yí ko-biə daanɪ Zezi Krisi ŋwaanɪ tɪn, á taá soe daanɪ dɪ á wɔrɔ maama, sɪ á taá nɪgɪ daanɪ lanyɪranɪ.

¹¹ Á na tɔŋɪ á pa Wɛ te tɪn, á yí pa yawɔrɔ zɔ abam. Kwe-na á bɪcara maama á taá maa tɔŋɪ á pa dí Yuutu wɔm.

¹² Á na jɪgɪ tɪna dɪ Wɛ te tɪn, á taá jɪgɪ wɔpɔlo kɔ ŋwaanɪ. Yaara na yí abam, sɪ á vɔ pu-dɪa. Kwaanɪ-na á taá loori Wɛ maŋa maama.

¹³ Cɛ-na á wəənu á ma zəni balɔ na yí Wɛ nɔɔna yí yinigə jɪgɪ-ba tɪn. Á taá jeeri vərə lanyɪranɪ á sam nɪ.

¹⁴ Kɔ na yí balɔ na jɪgɪ abam ba bɛɛsɪ tɪn, sɪ á taá loori Wɛ sɪ Dɪ kɪ-ba lanyɪranɪ. Á nan yí sɔɔlɪ á cɔgɪ-ba.

¹⁵ Kɪ-na wɔpɔlo dɪ balɔ na jɪgɪ wɔpɔlo tɪn, sɪ á daari á wəli dɪ balɔ na keeri tɪn á keeri.

¹⁶ Á taá jɪgɪ-na wɔbɔŋ-dɪdwɪ. Á yí taá kɪ kamunni. Tu-na á tɪtɪ sɪ á taá tɔŋɪ tɪtɔŋ-balɛ dɪ. Á yí taá bɔŋɪ á pa á jɪgɪ swan.

¹⁷ Nɔɔnɔ na kɪ abam lwarɪm, á dɪ daa yí joori á kɪ-o lwarɪm á ma ŋwɪ. Nan kwaanɪ-na sɪ á taá kɪ kɔlɔ na lana tɪn nɔɔna maama yigə nɪ.

¹⁸ Kwaanɪ-na lanyɪranɪ sɪ á taá zɔvri dɪ ywəəni nɔɔna maama tɪtarɪ nɪ, nɪ á na wai te tɪn.

19 A badon-sonnu-ba, á yí taá buñi sɪ á kɪ balu na kɪ abam lwarɪm tɪn dɪ lwarɪm. Nan yagɪ-na, sɪ Wɛ ban-zɔŋɔ kum wó ba ba baŋa. Bɛŋwaani kɪ pɔpɔni Wɛ tɔnɔ kum wɔni, nɪ Baŋa-Wɛ tagɪ Dɪ wɪ:

«Amu yɪ wulu na wó cɔgɪ nɔɔna dɪ ba kəm-balwaarɔ tɪn.

Amu wó pa ba joori ba na kulɔ na maŋɪ dɪ ba tɪn.»

20 Ku nan ta pɔpɔni kɪ wɪ:

«Nmɔ dɔm kana na wɔɛ, sɪ n pa-o wɔdiu sɪ o di.

Na-nyɔm na jɪg-o, sɪ n pa-o na sɪ o nyɔ.

N na kɪ kɔntɔ,

kɔbɔ pa cavɪra tiini ya ja-o.»

21 Abam nan yɪ pa lwarɪm wani abam. Á taá kɪ kəm-laarɔ sɪ tɪ wani lwarɪm dam tɪ cɔgɪ.

13

Dí na maŋɪ sɪ dí sɛ dí lɔgɔ kum yigə tiinə te tɪn

¹ Abam maama maŋɪ sɪ á sɛ dɪdɛera balu na te á tɪni dɪm tɪn ni, bɛŋwaani nɔɔn-nɔɔnɔ ba jɪgɪ dam sɪ o taa te o doŋ yɪ Wɛ wɔ pɛ kɪ tu cwɛŋə. Dɪdɛera balu na wɔra tɪn yɪ Wɛ mu tinjɪ-ba.

² Wulu maama na vɪn dɪdɛera bam kɔntɔ ni tɪn, kɪ tu vɪn cwɛŋə kalɔ Wɛ na tinjɪ tɪn mu. Balu na kɪ kɔntɔ doŋ tɪn wó na cam.

³ Dɪdɛera bam nan ba paɪ fɔbɔni jɪgɪ balu na kɪ kəm-laarɔ tɪn. Fɔbɔni jɪgɪ balu na kɪ kəm-balwaarɔ tɪn mu. Nmɔ na ba lagɪ sɪ fɔbɔni taa jɪgɪ-m dɪ dɪdɛera bam, n maŋɪ sɪ n ta n kɪ kəm-laarɔ mu sɪ kɪ pa n na zulə ba tee nɪ.

⁴ Wε nan tiŋi dɪdɛera bam sɪ ba taa tɔŋɪ ba pa-Dɪ abam zənə ŋwaanɪ mʊ. Abam nan na kɪ wɔ-balwaarɔ, á maŋɪ sɪ á taá kwarɪ fʊɔnɪ, bɛŋwaanɪ dɪdɛera bam sɪnɪ ba jɪgɪ cwəŋə sɪ ba pa nɔɔna na cam. Bantʊ mʊ yɪ balʊ Wε na tiŋi sɪ ba tɔgɪ Dɪ ban-zɔŋɔ kʊm ŋwaanɪ ba ma pa balʊ na kɪ lwarɪm tɪn na cam.

⁵ Kʊntʊ ŋwaanɪ mʊ á maŋɪ sɪ á sɛ ba ni. Kʊ daɪ ba na wó pa á na cam tɪn yɪranɪ ŋwaanɪ. Á sɛ-ba, bɛŋwaanɪ á ye á bɪcara nɪ, nɪ á maŋɪ sɪ á tɔgɪ cɪga cwəŋə mʊ.

⁶ Kʊ ta yɪ kʊntʊ ŋwaanɪ mʊ á maŋɪ sɪ á taá ŋwɪ lampoo. Bɛŋwaanɪ dɪdɛera bam tɔŋɪ ba pa Wε mʊ, dɪ ba na kwaanɪ ba tɔŋɪ te tɪn.

⁷ Nan taá ŋwɪ kʊlʊ maama ba na maŋɪ sɪ ba jɔŋɪ á tee nɪ tɪn á pa-ba. Kʊ na yɪ wʊlʊ na jɔŋɪ á yuu lampoo tɪn, naa wʊlʊ dɪ na jɔŋɪ á wəənu lampoo tɪn, sɪ á ŋwɪ á lampoo maama á pa-ba. Kʊ na yɪ wʊlʊ na maŋɪ sɪ á taá kwar-o tɪn, sɪ á taá kwar-o. Kʊ na yɪ wʊlʊ na maŋɪ dɪ zulə tɪn, sɪ á taá zul-o.

Dí na maŋɪ sɪ dí taá soe dí donnə te tɪn

⁸ Abam nan yɪ taá jɪgɪ-na nɔɔn-nɔɔnʊ wɔŋɔ jɪnɪ, jɪnɪ dɪlʊ á na wó taá jɪgɪ tɪn mʊ yɪ sɪ á taá soe á donnə. Wʊlʊ maama na soe o doŋ tɪn sɪnɪ o tɔgɪ Wε cullu tɪm dɪ Dɪ niə yam mʊ.

⁹ Wε cullu tɪm brɪ nɪ: «Yɪ kɪ boorim, yɪ gu nɔɔnʊ, yɪ ŋɔnɪ, yɪ pa n yɪ zʊ n donnə wəənu.» Cullu tɪm kʊntʊ dɪdaanɪ Wε niə yam maama nan tɔgɪ ni dɪdʊa mʊ. Ni dɪntʊ nan mʊ wɪ: «Ta n soe n doŋ nɪ n tɪtɪ te.»

¹⁰ Nmυ na soe n doη, n daa n bá want n kɪ-o balɔɔ. Wɔɔ na soe o doη tɪn sɪnɪ o kɪ Wɛ niə yam na brɪ kɔɔ tɪn mɔ.

Dí maηɪ sɪ dí ti dí yigə mɔ dí cəgi Zezi Krisi tum

¹¹ Á taá kɪ-na kɔntɔ, sɪ abam ye maηa kalɔ wɔnɪ dí na wɔra tɪn. Maηa yi sɪ á zaηɪ á yagɪ dɔɔm. Maηa kalɔ Wɛ na wú ba Dɪ vrɪ dɪbam tɪn daari fɪn sɪ ka yi, yɪ kɔ daa dai nɪnɛnɪ maηa kalɔ dí dɛen na puli dí kɪ dí wɔ-dɪdɔa dɪ Zezi tɪn.

¹² Maηa kam daari fɪn sɪ ka yi, nɪ tɪga na lagɪ ka pɔɔrɪ te tɪn. Tɪtɪ dɪm lagɪ dɪ ke sɪ wɪa pɔɔni ba. Kɔntɔ ηwaanɪ, á pa dí yagɪ kikiə yalɔ maama na yɪ lim nyɪm tɪn, sɪ dí daari dí ma Wɛ dam dɪm dí cɪ dí tɪtɪ, sɪ dí want dí tɔgɪ pɔɔni cwəηə kam.

¹³ Pa-na dí tɔgɪ cwəηə sɪ kɔ maηɪ dɪ balɔ na wɔ pɔɔni wɔnɪ te tɪn. Á nan pa-na dí yagɪ nɔn-kwəlɪm dɪ sa-nyɔrɪ dɪ boorim dɪ wo-digiru kikiə maama. Á yɪ taá jaanɪ daanɪ naa á taá kɪ wɔ-gɔɔ daanɪ.

¹⁴ Pa-na abam ηwɪa kam dɪdaanɪ dí Yuutu Zezi Krisi ηwɪa kam taa yɪ bɪdɔɪ. Nan yɪ pa-na á wɔbɔηa taa tɔgɪ wo-yɔɔrɔ tɪɔ á fra na zɔɔrɪ tɪn.

14

Dí wɔ maηɪ sɪ dí taá co daanɪ

¹ Jonɪ-na nɔɔnɔ wɔɔ wɔbɔηa ta na wɔ bɪgɪ Wɛ cwəηə kam wɔnɪ tɪn lanyɪranɪ. Á nan yɪ magɪ kantɔgɔ dɪ o na bɔηɪ te tɪn.

² Nɔɔnɔ wɔra o wɔbɔηa na bɪga Wɛ cwəηə kam wɔnɪ, kɔ ma pa o ba culi kɔɔkɔɔ dim. Kɔ

daari nɔɔnɔ wɔdon wɔra o wɔbɔɔna na wɔ biɔi yi kɔ pa o culi nwam.

³ Wɔlɔ nan na wai o di wɔɔo maama tin yi zaɔi o gooni wɔlɔ wɔm o na ba di wɔɔo maama tin. Wɔlɔ di nan na ba di wɔɔo maama tin yi zaɔi o co wɔlɔ na di wɔɔo maama tin, beɔwaaɔi o di yi We nɔɔnɔ mɔ.

⁴ Nmɔ yi wɔɔ mɔ si n co nɔɔnɔ wɔdon tintɔɔnɔ? Kɔ yi o titi yuutu wɔm mɔ maɔi si o nii o ki ciɔa naa o wɔ ki. Wɔlɔ na yi di Yuutu wɔm nɔɔnɔ tin ki lanyirani mɔ, beɔwaaɔi di Yuutu wɔm wɔ wani o pa o taa ki lanyirani.

⁵ Nɔɔnɔ wɔra o na li de o pa di dwe da yadonnɔ yam. Kɔ daari nɔɔnɔ wɔdon di maa wɔra o na ba kuri da yam daani. Nɔɔnɔ maama nan maɔi si o ki kɔlɔ o na ye o bicari ni ni kɔ maɔi tin.

⁶ Nɔɔnɔ wɔlɔ na kuri de si di taa yi da-kamunu tin yɔni o ki di Yuutu wɔm ɔwaaɔi mɔ. Wɔlɔ na di wɔɔo maama tin ki kɔntɔ o ma zuli di Yuutu wɔm mɔ, o na yɔni o ki We le wɔdiu kɔm baɔa ni tin ɔwaaɔi. Wɔlɔ di nan na ba di wɔɔo maama tin di ki kɔntɔ o ma zuli di Yuutu wɔm mɔ, yi o di ki We le kɔ ɔwaaɔi.

⁷ Dibam wɔlɔwɔlɔ ba ɔwi o titi yirani ɔwaaɔi. Di wɔlɔ nan na tiɔi di, kɔ ta dai o titi yirani ɔwaaɔi.

⁸ Di zi na ɔwi, di ɔwi di Yuutu wɔm ɔwaaɔi mɔ. Di nan zi na tiɔi di, kɔ ta yi di Yuutu wɔm ɔwaaɔi mɔ. Beɔwaaɔi, di na ɔwi naa di na tiɔa, di ta yi di Yuutu wɔm nɔɔna mɔ.

⁹ Zezi Kriɔi tiɔi yi o joori o bi o na ɔwia, si o taa yi twa di nanɔna Yuutu mɔ.

10 Kɔ na yɪ kɔntɔ tɪn, bɛɛ mɔ yɪ n co n ko-bu? Sɪ nmɔ dɪ, bɛɛ mɔ yɪ n gooni n ko-bu? Dɪbam maama nan lagɪ dɪ ba dɪ zɪgɪ Wɛ yigə nɪ mɔ, sɪ Dɪ dɪ dɪbam taanɪ.

11 Kɔ pɔpɔnɪ Wɛ tɔnɔ kɔm wɔnɪ, nɪ Baŋa-Wɛ tagɪ Dɪ wɪ:

«Amɔ na yɪ ŋwɪa tu tɪn,

kɔ yɪ cɪga mɔ nɪ,

nɔɔna maama wɔ ba ba kuni doonə amɔ yigə nɪ,

yɪ bá ta dɪ ba niə jaja,

nɪ amɔ mɔ yɪ Baŋa-Wɛ.»

12 Kɔntɔ brɪ nɪ dɪbam maama lagɪ dɪ ba dɪ zɪgɪ Wɛ yigə nɪ mɔ, sɪ nɔɔnɔ maama ta kɔlɔ o na kɪ tɪn.

Dɪ wɔ manɪ sɪ dɪ pa dɪ ko-bu tɪsi Wɛ cwəŋə wɔnɪ

13 Kɔntɔ tɪn, dɪ daa yɪ ta co dɪ donnə. Nan lɪ-na wɔbɔŋa sɪ á yɪ kɪ kɔlɔ na wɔ pa á ko-bu tɪsi naa o yagɪ Wɛ cwəŋə tɔgɪm tɪn.

14 Amɔ na ŋwɪ dɪ dɪ Yuutu Zezi tɪn, amɔ ye lanyɪranɪ nɪ wɔdiu tərə kɔ tɪtɪ na yɪ wo-digirɪ Wɛ yigə nɪ. Nɔɔnɔ nan na pɛ wɔŋo kɔlɔ yɪ culu, kɔ sɪnɪ kɔ yɪ culu mɔ kɔ pa nɔɔnɔ wɔm kɔntɔ.

15 Nmɔ nan na pɛ n ko-bu wɔ cɔgɪ dɪ n na dɪ wɔdiu kɔlɔ tɪn, kɔ brɪ nɪ n daa n ba tɔgɪ sono cwəŋə mɔ. Yɪ pa nmɔ na dɪ wɔdiu kɔlɔ tɪn cɔgɪ nɔɔnɔ dɪ Wɛ daanɪ, yɪ o yɪ wɔlɔ Zezi Krisi na tɪgɪ o ŋwaanɪ tɪn.

16 Yɪ pa nɔɔna na cwəŋə sɪ ba co wɔŋo kɔlɔ na lana dɪ nmɔ tɪn.

17 Dɪbam na yɪ Wɛ paarɪ dɪm nɔɔna te tɪn ba tɔgɪ wɔdiiru dɪm ŋwaanɪ. Kɔ nan tɔgɪ dɪ na kɪ

ciga We yigə ni tin ηwaani mu, di wu-zuru di wupolo, ni We Joro kum na pai dɔbam te tin.

¹⁸ Wulɔ maama nan na tɔɔi o pa Zezi Kriɔi kuntu doɔ tin, kuntu tu wɔ poli We wu, yi nɔɔna di wɔ pa-o ciga.

¹⁹ Kuntu ηwaani, pa-na di kwaanɔ di taá ki kulɔ maama na pai nɔɔna jigi ywəni daani yi ku zəni-ba si ba bi We cwəɔə wɔni tin.

²⁰ Yi pa wɔdiiru dim cɔgi We titɔɔa. Wɔdiiru maama maɔi dim mu. Nmu nan na di kulɔ na wɔ pa n doɔ wu cɔgi ku ηwaani tin, si n yagi ku dim.

²¹ Ku lana si n yi ki kulɔ maama na wɔ pa n ko-bu tusi We cwəɔə ni tin, ku na yi nwana dim naa sana nyɔm naa kulɔ maama di.

²² Nmu na ye kulɔ n wubɔɔa ni kantɔ laɔa ni tin, ta n jigi-ku nmu di We laɔa ni. Nɔɔnɔ wulɔ na ye kulɔ na lana si o ki yi o ba jigi wubɔɔa yale ku baɔa ni tin, kuntu tu jigi yu-yoɔo.

²³ Ku daari, nɔɔnɔ wulɔ na jigi bubwɛa di o na di wɔdiu kulɔ tin, kuntu tu bá na bura We tee ni. Ku bri ni o ba jigi wu-didɔa o dim dim wɔni. Woɔo kulɔ maama nmu na wɔ ki yi n ba jigi wu-didɔa tin, ku yi lwarim mu.

15

Dí na maɔi si dí taá ki te di dí donnə tin

¹ Dɔbam balɔ wubɔɔa na biɔi We cwəɔə kam wɔni tin maɔi si dí taá wəli balɔ wubɔɔa ta na wu biɔi tin mu, ba wubɔɔa ta na bwənə tin ηwaani. Dí wu maɔi si dí taá ki kulɔ na poli dɔbam yirani wuru tin.

² Dɔ́bam maama nan maɲɪ sɪ dí taá kɪ kɔ́lɔ na wó poli dí donnə wɔ́rɔ tɪn mɔ, dí maɲɪ sɪ dí kɪ-ba lanyɪranɪ mɔ sɪ kɔ pa ba fɔ́ɔ ba bɪ Wɛ cwəŋə wɔ́nɪ.

³ Zezi Krisi dɛɛn nan wɔ kɪ kɔ́lɔ na poli o yɪranɪ wɔ tɪn, nɪ Wɛ tɔ́nɔ kɔ́m na tagɪ te kɔ wɪ: «Trɔ tɪlɔ nɔ́ɔna na twɪ nmɔ Baɲa-Wɛ tɪn mɔ joori tɪ tɔ amɔ yuu nɪ.»

⁴ Kɔ́lɔ maama dɛɛn na pɔ́pɔnɪ Wɛ tɔ́nɔ kɔ́m wɔ́nɪ tɪn yɪ sɪ kɔ taa brɪ dɔ́bam Wɛ cɪga kam mɔ, sɪ kɔ pa dí na pu-dɪa dɪ baarɪ sɪ dí taá jɪɔ tɪna Wɛ tee nɪ.

⁵ Wɛ mɔ yɪ wɔ́lɔ na paɪ nɔ́ɔna pu-dɪa dɪ baarɪ tɪn, yɪ dɪntɔ wó pa á taá jɪɔ wɔ́bɔŋ-dɪdwɪ nɪ Zezi Krisi na lagɪ te tɪn.

⁶ Kɔ́ntɔ, kɔ́v pa abam maama sɛ daanɪ yɪ á taá jɪɔ nɪ dɪdwɪ á ma zuli Wɛ dɪlɔ na yɪ dí Yuutu Zezi Krisi Ko tɪn.

⁷ Joŋi-na daanɪ lanyɪranɪ nɪ Zezi Krisi na joŋi abam te tɪn. Kɔ́ntɔ wó pa Wɛ na zulə.

Wɛ kwər-ywəŋə kam yɪ dwi maama nyɪm mɔ

⁸ Amɔ nan lagɪ a ta abam nɪ Zezi Krisi tu sɪ o tɔ́ŋɪ o pa Zwifəbam mɔ, sɪ kɔ pa Wɛ na goni nɪ dɪ ba nabaara bam te tɪn sɪnɪ kɔ kɪ, sɪ kɔ brɪ nɪ Wɛ yɪ cɪga tu.

⁹ O tum dɪm ta yɪ sɪ kɔ pa dwi-geɪnə bam dɪ mɔ ba ba zuli Wɛ Dɪ na jɪɔ ba yibwəŋə tɪn ŋwaanɪ, nɪ Wɛ tɔ́nɔ kɔ́m na tagɪ te kɔ wɪ: «Amɔ wó wəli dɪ dwi-geɪnə bam a zuli nmɔ, yɪ a leeni a tee nmɔ yɪrɪ.»

¹⁰ Kɔ ta pɔ́pɔnɪ kɔ wɪ:

«Abam dwi-geɪnə bam wəli-na dɪ Wɛ nɔ́ɔna bam maama á taá kɪ wɔ́polo.»

¹¹ Kɔ ta wɪ:

«Abam dwi-ge tiinə bam maama taá zuli-na
Yuutu Baŋa-Wɛ.

Pa-na lɔɔ baŋa dwi maama taa tee-DI.»

¹² Ezayidɪ dɛɛn tagɪ o wɪ:

«Zesedwi dɪm tu didua wó zanɪ o ba sɪ o taa te
lɔɔ baŋa dwi tiinə maama,

yɪ bantɔ wó ta jɪɪ tɪna o ŋwaanɪ.»

¹³ Wɛ dilɔ na paɪ á jɪɪ tɪna tɪn wó pa á tiini á
taá jɪɪ wɔpolo dɪ wɔ-zuru, á na kɪ á wɔ-didua dɪ
DI tɪn ŋwaanɪ. Wɛ Joro kɔm dam laan wó pa á
na jɪɪ tɪna dɪ Wɛ te tɪn fɔɪ kɔ puli kɔ ja gaali.

Pooli na ŋɔɔnɪ o titɔŋa yam woŋo te tɪn

¹⁴ A ko-biə-ba, amɔ titɪ ye nɪ abam kɪ kəm-
laaru zanzan mɔ, yɪ á tiini á jɪɪ yəno kɔ paɪ á
wai á bri daanɪ dɪ Wɛ cɪga kam.

¹⁵ Amɔ pɔpɔnɪ wəənu tidonnə dɪ baaru mɔ
tɔnɔ kɔntɔ wɔnɪ, sɪ a maa guli abam wəənu tɪlɔ
á na manɪ á zaasi tɪn. Amɔ pɔpɔnɪ kɔntɔ dɪ Wɛ
na pɛ-nɪ yu-yoŋo,

¹⁶ sɪ a taa yɪ Zezi Kriɪ tɪntɔŋnɔ dwi-ge tiinə
bam ŋwaanɪ tɪn mɔ. Amɔ na tɔŋɪ a pa Wɛ te
tɪn yɪ sɪ a yəni a tɔɔlɪ DI kwər-ywəŋə kam mɔ,
sɪ a wanɪ a jɔŋɪ dwi-ge tiinə a kɪ-ba Wɛ jɪŋa nɪ,
sɪ ba pa DI wɔ poli, DI Jorokɔm na fɔɪ kɔ kwe
ba bicara tɪn ŋwaanɪ.

¹⁷ Kɔntɔ, amɔ na ŋwɪ dɪ Zezi Kriɪ tɪn ŋwaanɪ,
a kɪ wɔpolo dɪ a na tɔŋɪ a pa Wɛ te tɪn.

¹⁸ Amɔ nan ba jɪɪ baaru sɪ a ŋɔɔnɪ kɔlɔkɔlɔ,
kɔ na dai Zezi Kriɪ na mɛ amɔ o kɪ kɔlɔ tɪn
yɪranɪ. Kɔ yɪ Zezi mɔ pɛ kɔ tɔɪ dɪ a ni-taanɪ dɪ
a titɔŋa yɪ dwi-ge tiinə bam sɛ Wɛ.

19 Ba ma sɛ Wɛ dɪ DI na dɛ DI Joro kʊm dam ɲwaanɪ DI pa ba na wo-kɪnkagɪla dɪ maana yalɔ na brɪ DI dam tɪn. Kɔ yɪ kʊntʊ donɲ mʊ amʊ zɪgɪ Zeruzalɛm nɪ a tʊlɪ je sɪm maama a vu a yɪ Yiliiri, yɪ a brɪ Wɛ cɪga kalɔ maama na yɪ Zezi Krisi kwɛr-ywɛɲɔ kam nyɪm tɪn.

20 Maɲa maama amʊ lagɪ sɪ a kwaanɪ a taa tʊlɪ Zezi kwɛr-ywɛɲɔ kam je sɪlɔ nɪ, ba daa ta na wʊ ni Zezi Krisi taanɪ dɪm da tɪn mʊ. Amʊ ba lagɪ sɪ a tʊlɪ-ka je sɪlɔ nɪ, ba na maɲɪ ba ni-ka tɪn, sɪ kɔ yɪ taa nyɪ nɪ, nɔɔnʊ wʊdonɲ kɛbrɛ yuu nɪ mʊ amʊ tu a lɔ,

21 nɪ kɔ na maɲɪ kɔ pʊpʊnɪ Wɛ tɔnɔ kʊm wʊnɪ te kɔ wɪ:

«Ba ta na wʊ tʊlɪ o kwɛrɛ ba brɪ balɔ tɪn laan wʊ ba ba lwarɪ-ka.

Balɔ ta na wʊ ni o ɲwa tɪn

laan wʊ ba ba ni o cɪga kam kuri.»

Pooli na buɲɪ sɪ o vu o na Rom tiinɔ bam te tɪn

22 Mʊ kɔ kuri amʊ gɛ laɲa kuni zanzan sɪ a ba abam te.

23 Kɔ daari lele kʊntʊ, je sɪm kʊntʊ nɪ jɛgɔ daa tɛrɛ ba na wʊ ni Zezi kwɛr-ywɛɲɔ kam da. Abam fra na maɲɪ ya jɪgɪ amʊ bɪna zanzan sɪ a ba a na abam tɪn,

24 amʊ laan buɲɪ sɪ a ba maɲa kalɔ a na lagɪ a zaɲɪ a vu ɛsɪpanyɪ tɪn. Amʊ lagɪ sɪ a tɔgɪ abam te, sɪ a wanɪ a kɪ wʊpolo dɪ abam maɲa finfin, sɪ á laan wanɪ á wɛli-nɪ sɪ a kwe cwɛɲɔ a kɛ.

25 Kɔ daari lele kʊntʊ amʊ lagɪ a vu Zeruzalɛm mʊ, sɪ a tʊɲɪ a wɛli Zezi nɔɔna balɔ na wʊ dáanɪ tɪn.

²⁶ Zezi kɔgɔ kɔm nɔɔna balɔ na wɔ Masɪɔvɔnɪ dɪ Akayi tɪnɪ dɪm nɪ tɪn mɔ mɛ ba wɔbɔɔɔ ba la sɛbu, sɪ ba ma wɛli Zezi nɔɔna balɔ na wɔ Zeruzalem nɪ yɪ yinigɛ jɪgɪ-ba tɪn.

²⁷ Kɔ yɪ ba titɪ mɔ mɛ ba wɔbɔɔɔ ba kɪ kɔntɔ. Kɔ nan maɲɪ sɪ ba wɛli-ba kɔntɔ doɲ, bɛɲwaanɪ Zwifɛ bam ya maɲɪ ba kwe wɛɛnu tɪɔ Wɛ Jorona pɛ-ba tɪn mɔ ba cɛ dɪ dwi-gɛtiinɛ bam. Kɔntɔ ɲwaanɪ dwi-gɛ tiinɛ bam maɲɪ sɪ ba dɪ daa wɛli Zwifɛ bam dɪ wɛɛnu tɪɔ na yɪ ba yɪra zɛnɛ nyɪm tɪn.

²⁸ Amɔ na ti titɔɲɪ dɪntɔ yɪ a kwe sɛbu kɔm maama a kɪ nɔɔna bam jɪɲa nɪ, amɔ laan wɔ tɔgɪ abam te, yɪ a daari a kɛ a vu ɛsɪpanyɪ.

²⁹ Amɔ nan ye nɪ, a na tu abam te, Zezi Krisi wɔ kɪ abam lanyɪranɪ kɔ ja gaali.

³⁰ A ko-biɛ-ba, amɔ nan lagɪ a loori abam dɪ Yuutu Zezi Krisi yɪrɪ ɲwaanɪ, dɪ sono kɔɔ Wɛ Joro kɔm na pɛ dɪbam tɪn ɲwaanɪ, sɪ á tɔgɪ á wɛli-nɪ á taá tiini á loori Wɛ á pa-nɪ a titɔɲ-cɛɛra yam wɔnɪ.

³¹ Looɪi-na Wɛ, sɪ Dɪ jonɪ-nɪ balɔ na wɔ Zude nɪ yɪ ba vɪn Zezi tɪn jɪɲa nɪ, sɪ Dɪ daari Dɪ pa Zezi nɔɔna balɔ na wɔ Zeruzalem nɪ tɪn jonɪ kɔɔ amɔ na wɔ pa-ba tɪn dɪ wɔpolo.

³² Wɛ na sɛ, amɔ laan wɔ wantɪ a ba abam te dɪ wɔpolo, yɪ a dɪ ywɛɛni dɪ abam.

³³ Bɪcarɪ-zuru Tu Baɲa-Wɛ wɔ ta wɔ abam tee nɪ. Amina.

16

Pooli jɔɔnɪ nɔɔna balɔ maama o na ye tɪn

¹ Amv nan lagı a brı abam dı ko-bu Feebe na yı wulv tın mv. Wuntu yı kaanı wulv na tıñı o weli Zezi kəgə kulv na wv Sankrı nı tın mv.

² Abam nan mañı sı á joñ-o lanyıranı dı Yuutu wvm ɲwaanı, nı kv na mañı sı We nɔɔna taa kı te tın. Á taá wəl-o dı kulv maama o na lagı abam tee nı tın, beɲwaanı o tıttı dı zəni nɔɔna zanzan, kv na dwe dıdı dı amv dı.

³ Jɔɔnı-na Prisili dı Akwila á pa-nı. Bantv mv tɔgı dı amv yı dı tıñı dı pa Zezi Krisi.

⁴ Ba ya gɛ fun sı ba tı amv ɲwaanı. Amv nan kı-ba le, kv nan dai amv yıranı, kv yı dwi-geetiñə balv maama na tu ba sɛ Zezi tın dı mv kı-ba le.

⁵ Jɔɔnı-na Zezi kəgə kulv na jeeri ba sɔñɔ kvm nı tın á pa-nı.

Jɔɔnı-na amv cilon-sono Yipayinetı á pa-nı, wuntu mv yı wulv na de yigə o sɛ Zezi Krisi Azi tıttı dım maama wvni tın.

⁶ Jɔɔnı-na Mari wulv na tiini o tıñı o pa abam tın dı.

⁷ Jɔɔnı-na amv dwi tiinə Andronikusi dı Zuniyası. Bantv mv ya tɔgı ba wv pına digə nı dı amv. Ba yı balv na jıgı yr-ɲvm Zezi tıttıɲna bam wvni, yı bantv sɛ Zezi Krisi ba loori amv.

⁸ Jɔɔnı-na Ampiliatusi wulv na yı a cilon-sono dı Yuutu wvm ɲwaanı tın á pa-nı.

⁹ Jɔɔnı-na Yuriben wulv na tɔgı dı dıbam o tıñı Zezi Krisi tıttıɲa tın, dıdaanı amv cilon-sono Sıtakisi dı.

¹⁰ Jɔɔnı-na Apeeli wulv na brı nı o yı Zezi Krisi tıttıɲnv cıga cıga tın á pa-nı.

Jɔɔnı-na Arisobuli sɔñɔ tiinə bam dı.

- 11 Jɔɔnɩ-na amɔ dwi tu Erodiiyon á pa-nɩ.
 Jɔɔnɩ-na balɔ na yɩ Narisisi sɔɔɔ tiinɔ yɩ ba yɩ dí
 Yuutu wɔm nɔɔna tɩn á pa-nɩ.
- 12 Jɔɔnɩ-na Trifɛnɩ dɩ Trifɔsɩ, bantɔ mɔ yɩ kaana
 balɔ na tiini ba tɔɔɩ dí Yuutu wɔm tɩtɔɔa
 yam tɩn.
 Jɔɔnɩ-na a ko-bu-sono Pɛɛrsidi, wɔntɔ mɔ yɩ
 kaanɩ wɔlɔ dɩ na tiini o tɔɔɩ o pa dí Yuutu
 wɔm.
- 13 Jɔɔnɩ-na Rufusi wɔlɔ na yɩ dí Yuutu wɔm
 tɩntɔɔ-ɩɩm tɩn, dɩ o nu wɔlɔ na kɩ amɔ
 lanyɩranɩ nɩ o tɩtɩ bu te tɩn.
- 14 Jɔɔnɩ-na Asɩnkriti dɩ Filigon dɩ Ermɛsɩ dɩ
 Patrobasɩ dɩ Ermasɩ, dɩdaanɩ dí ko-biə
 balɔ maama na wɔ ba tee nɩ tɩn.
- 15 Jɔɔnɩ-na Filologi dɩ Zuli, dɩ Neere dɩ o nakɔ,
 dɩ Olimpa, dɩdaanɩ Wɛ nɔɔna balɔ maama
 na wɔ ba tee nɩ tɩn.
- 16 Á na jeeri daanɩ, sɩ á taá jɔɔnɩ daanɩ
 lanyɩranɩ dɩ sono dɩ wɔ-ponɔɔ. Zezi kɔɔɔ kum
 na wɔ je sɩlɔ maama nɩ tɩn dɩ jɔɔnɩ abam.
- 17 A ko-biə-ba, a nan loori abam sɩ á fɔɔɩ á cɩ
 á tɩtɩ dɩ balɔ na jaanɩ kampwara ba tui nɔɔna
 tɩtarɩ, yɩ ba paɩ ba tusi Wɛ cwɔɔɔ wɔnɩ tɩn.
 Bantɔ mɔ jɩɔɩ zaasɩm dɩlɔ ba na brɩ abam tɩn
 ba yáala. Kuntɔ ɩɩwaanɩ ja-na á tɩtɩ dɩ ba.
- 18 Nɔɔna bam kuntɔ donɩ ba kɩ dí Yuutu Zezi
 Krisi na lagɩ kulɔ tɩn, ba tɔɔɩ ba tɩtɩ fra na zɔɔrɩ
 wɔɔnɩ tɩlɔ tɩn mɔ. Ba yɔnɩ ba ɩɔɔnɩ bɩtar-ywe
 mɔ, yɩ ba ma ni-sɔɔɩ ba ma ganɩ balɔ na ba va
 ni tɩn ba pa ba wɔbɔɔa lɔni.
- 19 Nɔɔna maama ye abam na tɔɔɩ Wɛ lanyɩranɩ
 te tɩn, kuntɔ mɔ paɩ amɔ tiini a jɩɔɩ wɔpɔlɔ dɩ

abam. Amu nan lagu si abam taá jigi swan mu si á taá ki kulub na lana tin, si á daari á taá ye á titi si lwarim yi cogi abam.

²⁰ We dilu na pai noona wu-zuru tin bá daanu DI cogi sutaanidam, yi DI laan pa á no-di di á ne.

Dí Yuutu Zezi wó pa abam yu-yono.

²¹ Timoti wulu na togi di amu o taji tin di joni abam. Amu dwi tiinè Lukiyusi di Zazon di Sosipateeri di joni abam.

²² Amu Teritiyusi mu pupuni Pooli ni-taanu dintu yi o pa abam, amu di nan joni abam dí Yuutu wum nwaanu.

²³ Gayusi wulu amu Pooli na zubi o soho ni yi Zezi kogo kum di jeeri da tin joni abam.

Erasiti wulu na yi tu kum sabu-tinnyu tin, didaanu dí ko-bu Kwatusi di joni abam.

[
²⁴ Dí Yuutu Zezi Kresi wó pa abam maama yu-yono. Amina.]

Pooli na ki We le te o ma guri tin

²⁵ Dí ki We le, dintu dam dum mu pai á fogi á zigi lanyiranu di á na se DI kwær-ywəŋə kalu amu na toli Zezi Kresi nwaanu tin. Kuntu mu abam laan tu á lwaru We ciga kalu deen ya na səgi faŋa faŋa tin.

²⁶ Lele kuntu We togi DI nijonə bam deen na pupuni wənu tulu ba tiji tin nwaanu mu, DI pa DI ciga kam kuntu ba ka lwaru jaja. We dilu na jigi nwa si ku taa ve maŋa kalu na ba ti tin laan mu pe ni, si lugu baŋa dwi maama na cwəŋə ba lwaru DI ciga kam, si ba daari ba ki ba wu-didua di DI ba se DI ni.

²⁷ Dintu yirani mu yi swan maama tu, yi DI
ba jigi don. Dintu mu manji di zula si ku taa ve
mana kalu na ba ti tin Zezi Kisi yiri nwaani.
Amina.

Wε Tɔno dɪ kasum

Kasem (Kassem): Wε Tɔno dɪ kasum New Testament

copyright © 1997 Wycliffe Bible Translators, Inc.

Language: (Kasem)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 28 Dec 2024 from source files dated 29 Jan 2022

993cfae5-b100-5981-87e7-5a648d773cb9